

九國志

壹

14  
1475  
16





門  
1472  
16  
卷

道光丁未鐫

# 九國志

宋路振撰

海山仙館叢書

二年封宏農王天復  
月真長卷手五十四盒  
王兩水  
元

長福元年七月再入揚州唐以為淮南節度使乾寧  
九啓三年入揚州自稱淮南留後  
化源唐  
歷傳  
十六年  
人唐中  
州至  
年為



門 1 4  
號 1475  
卷 16

蘇公館藏書

九國志

九國志卷一

九國志卷一

宋 路 振 撰

昭和十五年  
十二月二日 購求

吳太祖以唐景福元年再入揚州至睿帝天祚三年為南唐所篡蓋晉天福三年也歷傳四主凡四十六年太祖姓楊名行密初名行愨字化源廬州合肥人唐中和三年起兵為亂光啓三年入揚州自稱淮南留後景福元年七月再入揚州唐以為淮南節度使乾寧二年封宏農王天復二年進爵吳王天祐二年十一月庚辰薨年五十四諡曰孝武王廟號太祖乾貞元



年追尊爲武皇帝陵曰興陵

烈祖名渥字承天行密長子唐天祐二年冬嗣位五年五月戊寅爲張顥徐溫所弒年二十三諡曰威武義初改諡景王廟號烈祖乾貞元年追尊爲景皇帝陵曰紹陵

高祖名隆演初名瀛又名渭字鴻原行密第二子唐天祐五年五月己卯嗣位十六年建吳國改唐天祐爲武義元年二年四月己丑薨年二十四諡曰宣乾貞元年尊爲高祖宣皇帝陵曰肅陵

睿帝名傳行密第四子武義二年六月戊申嗣位改元順義乾貞元年稱帝天祚三年禪位南唐昇元二年十月辛丑薨年二十八追諡曰睿皇帝塋平陵凡改元四順義六年乾貞二年太和六年天祚三年

吳

袁襲

襲廬江人少好學善屬文洞明緯象秦畢之亂高駢辟行密爲行軍司馬俾率所部赴難行密猶豫不行襲言於行密曰高駢倦於政事聽惑妖妄彥等雖以誅呂用



之爲名觀其事乃以暴易亂耳寧知非天將贊於公耶  
行密善其言乃移核諸州誘集徒衆將兵數萬長驅至  
廣陵秦畢害駢襲勸行密縞素舉哀於城下衆皆義之  
及破賊入城招輯編戶會孫儒兵至行密問計於襲曰  
今城壁未完賊且盛若儒至圍城是重擾民也不如且  
避之先是海陵將高霸擁衆來附行密將令以兵屯天  
長扼儒來路襲謂行密曰霸擁大衆心持兩端若使居  
天長是自扼也可因犒其士卒擒而斬之行密遂斬霸  
而併其兵行密聞孫儒至復欲遁歸海陵襲曰不若歸

合肥繕甲兵再議攻取今稽諸乾象公必再來及孫儒  
逼城行密果自天長返謂襲曰無子吾幾不得歸行密  
平宣州獲趙鏗留與其弟同館鏗與梁祖有素果遣使  
來求鏗時襲寢疾行密使人問襲襲曰但斬首送之必  
無慮也未幾卒襲剛忍好克每欲殺人必折節下之行  
密哭之曰吾每恤刑而襲好殺享年不永深可哀也

劉威

威廬州慎縣人少爲小吏豪爽有志節與田頴陶雅俱  
爲行密奔走之舊行密起淝上及平秦畢有功表領寶



州刺史大順初與安仁義敗孫儒別將劉建鋒於武進其後儒兵益集威與頽屢爲所敗行密將歸銅官威曰今衆寡勢殊殆難與爭然儒焚室掃壘絕後而來糧若不繼何從供饋公宜勿與戰堅壁以禦之坐待其弊行密然之儒果敗乾寧初表授廬州刺史及行密承制封拜就遷淮南節度副使行軍司馬東西行營副都統未幾加使相天祐三年授鎮南軍節度使撫州危全諷率虔吉撫信之衆十餘萬將復鍾傳舊地時州兵無多士庶大駭威獨傲然日縱酣飲全諷屯象牙潭不敢輕進

及周本破全諷四州初平涓令威巡視四境撫諭而還先是行密疾病問周隱以後事隱以威爲請威初聞不能無意及移鎮鍾陵復多專刑徐溫請討威威聞之沮喪計無所出有幕客黃訥謂威曰公受謫雖深反本無狀能挺身入覲必解前疑也威曰善遂遣訥爲先容涓果復令之鎮天祐十一年卒於鎮年五十八

陶雅

雅字國華合肥人本儒家子儀形魁偉眉目甚秀乾符中天下將亂始投筆和門會西蕃入寇徵四方兵防秋



靈夏雅與行密淝上軍偕往未幾改隸諸葛爽征沙陁有功從爽鎮河陽還補廬州衝山指揮使行密據合肥遣雅平鄉盜秦定過修己等遷八營主將光啓初破桐城吳迥擊李本於柳子山乘勝攻舒州下之以雅爲舒州刺史爲蔡盜許勅潛兵夜至雅奔歸文德初從行密破趙鏗授池州刺史大順中破孫儒軍於人頭山儒平授常州刺史遷池州團練使田頔攻歙州時給事中裴樞守新安將歸款於行密以宣州副使魯邵往代之是時諸將授郡鮮不以虐斂爲事惟雅寬厚人多便之樞

因遣問政山人聶師道往說頔曰苟得池陽陶牧爲守州人孰不承命頔驛報行密因令雅治新安入見樞盡州郡禮樞奇之及樞至京師奏雅爲歙州刺史天復三年田頔以宣州叛雅以州兵助臺濛伐之頔出戰橋陷墮馬爲帳下小卒許渥王綬所殺宣州平兼西南面招討使先是順義軍使汪武聚盜據婺源行密以爲滁州刺史婺源歙屬邑武恃險未嘗謁雅及頔叛武多行剽劫至是雅移檄聲言討洪饒由婺源往武引弟姪十餘人就路迎謁雅顧左右擒殺之緩轡入其營中無敢動者



天祐初陳詢以睦州歸款吳越遣萬眾攻詢雅率兵救之軍士夜驚多踰營遁去將吏白雅欠伸不應乃下令曰明旦有軍士不在營者俱斬遞相傳告未頃而定明年破婺州虜越州刺史沈夏以功遷衢睦團練使江南都招討會宣州王茂章叛奔越雅虜茂章伏兵斷其歸路乃令大將軍金師會領睦州事遂班師新安而越兵大至衢睦婺三州復沒八年移鎮武昌雅利黟川殷阜上書請之遂遙領武昌軍節度加同平章事知歙州團練觀察等事十年八月卒於任年五十七雅性沉靜好

讀書手不釋卷雖臨陣敵常褰衣博帶自幼年戲弄未嘗有錐刀傷手及為大將每矢石交飛終莫能中接賓佐有禮事父兄以孝敬非公宴不舉音樂疎財重士人以此歸之典黟川二十餘年民感其化生男女或以陶為字焉

李神福

神福涪州人幼執親喪哀毀過瘠鄉里異之及長沈厚勇敢唐末四境交募勁兵因逮上黨軍籍時高駢兼諸道行營都統神福從州將王重屯淮海因投於行密中



和中同安賊陳儒攻刺史高瀆遣使來告行密未能救  
謀於神福對曰此羣盜烏合易與耳公但聲言赴援可  
不勞尺刀爲公解之乃請本軍旌旗間道以入旣夕引  
州兵出外各持旌旗入列大陣之狀儒果夜遁行密大  
奇之光啓二年壽州張勣叛寇淝上神福率兵與戰敗  
之於楮城秦畢之亂高駢召行密因遣神福諭曲谿劉  
金盱賸賈令威各以義兵來附破秦畢軍神福功居多  
會選卒爲黃頭軍遷神福爲左右黃頭都尉龍紀中涇  
縣王賞太平嵇常滿俱聚盜剽鄉里神福引兵破之但

誅其首惡餘皆不問大順二年孫儒前鋒兵屯溧水行  
密遣神福將兵禦之神福謂諸將曰兵倍不戰况儒眾  
十倍於我當且避其銳以驕之乃退舍而儒眾果怠神  
福乃選銳卒躋險夜襲之果大潰又擊儒要山寨破之  
擒其將李宏以功改左游奕將銅官鎮邊使田頔爲孫  
儒所敗行密欲退守銅官神福諫曰儒掃境而來利在  
速戰宜堅壁清野以老其師神福願以本軍據險結柵  
時出輕騎抄其糧運彼前不得戰退無儲糧此送死之  
道行密曰善因以神福爲宣池兩路都游奕使是夏儒



九國志卷一  
食盡果敗以功奏授左千牛衛將軍景福二年廬州刺史蔡儔叛遣何瓌來寇神福迎擊於青斗山大破之遂傳城下賊平遷左衛都校未幾授舒州刺史天福元年與呂師造攻臨安錢鏐使顧全武來援神福退師令羸老行又令師造設伏青山路自將一軍殿後夜未半全武果盡銳來追神福僞北走伏軍發前返夾攻越軍大敗擒全武復攻臨安久不克先是神福遣使護鏐先坐禁其樵採及獲全武又遣通家問越人皆感之因納其犒賂而返二年改昇州刺史行密以女妻其子承鼎三

年攻杜洪於鄂州大敗洪軍時城中積荻山上神福謂將軍曰今夜焚此諸將皆不測是夕遣人乘舟載火炬至澚口分焚樹僞爲梁軍來援之狀城中焚荻應之諸將伏其智梁祖遣將韓勅率步騎萬餘屯澚口又令荆南以舟師赴援成汭盡衆浮江而下神福登岸望之曰舟人雖盛然首尾懸絕宜急擊之乃迎戰大別山汭果敗溺水死勅亦引衆遁去自是洪勢益孤會宣州田頔叛襲昇州劫神福與帳下妻子俱歸宛陵厚養之以誘神福行密急書召神福覽書卽袖之揚言曰鄂州尙未



下又令急取荆南因號令諸軍逮閩順流而下頽遣將  
王壇汪建以舟師援洪又別遣人遺神福書約分地而  
治神福斬其使擊壇建破之復戰於皖口又敗其衆浮  
尸棄舟蔽江而下壇建以輕舟遁去四年以兵屯田梁  
加西面行營招討使光州團練使疾甚求醫於江都卒  
年五十

臺濛

濛字頂雲廬州合肥人少爲金牛鎮將行密據合肥始  
來歸從征秦畢趙錕俱破敵有功大順中馬敬言爲孫

儒敗於廣德初儒與李從立乘勝至東谿時城守未固  
軍士大恐濛以一旅巡谿西會天晦詐令士卒傳諭往  
返者數四謂大眾屯集中夜皆遁去及儒柵陵陽濛於  
魯江五堰作輕舟饋糧終儒之世軍無饑色從行密歸  
廣陵以功遷楚州刺史乾寧三年破蘇州以濛守之越  
人水陸大至濛擊敗之錢鏐親率舟師至會糧盡濛拔  
衆遁歸光化二年行密初得朐山以濛爲海州刺史在  
任貪殘爲郡民所訴又爲田頽所譖降爲漣水制置使  
天復三年田頽叛於宣州行密歷數諸將無敵頽者乃



謂濛曰非公莫可濛曰頽不守富貴自取滅亡濛今仗大王威武以順翦逆往必擒頽願王無慮行密大悅濛初入其境卽翻陣以往軍士俱笑其怯濛曰頽宿將多謀當自過防翌日果遇陣於廣德濛欲奪其銳先以行密書遺頽將校皆下馬拜受因其擾亂濛麾衆擊之頽兵大敗乘勝遂圍宣城冬十月頽出州外求戰登橋馬墜爲外軍所殺宣州平行密承制加濛檢校太保宣州觀察使天祐元年卒於治所年五十

張訓

訓字克明滁州清流人身長八尺餘腰帶十圍中和三年歸行密於合肥行密訪以方畧悅之令從石令言攻同川克其城從田頽擊張勣於褚城因入擊趙錕昌山兵破之克宣州訓功居多遷左右黃頭指揮使以所部戍廣德拒孫儒於黃池從李神福襲歷陽下滁州孫儒焚廣陵悉銳攻宣州行密命訓潛軍入廣陵滅其餘燎獲軍儲數十萬以賑饑民行密令馬爽守廣陵爽叛爲諸將所殺城中大囂訓整師以出衆乃定孫儒之起也毗陵守將劉建鋒從儒俱西土豪陳可見據毗陵訓率



兵奄至城下可見倉卒出迎訓於馬上手刃殺之奪其  
兵入城中又率兵絕儒糧道於安吉馬頭儒敗訓論功  
爲最景福元年從行密歸江都路經毗陵行密顧左右  
曰毗陵大城也訓以一劍下之不亦壯哉卽授温州刺  
史乾寧二年屯兵漣水以備梁師劉知俊聚糧石碭戍  
守皆潰盡焚其儲積訓歸路出東海爲知俊所邀訓擊  
大破之青口之役吳師悉起訓帥所部迎行密行密喜  
以兵千人令爲前鋒會朱瑾假梁人兵鋒先入其壘訓  
登岸疾戰踰柵而入遂破龐從軍以功授淮海游奕使

天福三年王茂章平密州以訓爲刺史會梁祖以大軍  
至訓謂諸將曰城孤師少何以待之皆欲焚城掠聚而  
去訓曰不可如此則我師難歸遂封府藏下懸門立虛  
幟於城上遣老弱居前訓自以銳兵殿其後梁軍前鋒  
至見城上旗多未敢逼數日方入城又見府庫城邑晏  
然如故亦不追之天祐七年遷黃州刺史卒於治所訓  
質直勇而多力曾渡毗陵西橋馬畏不渡乃持尾鬣舉  
之以濟然不恃其勇故多功保全焉

李遇



遇合淝人始事行密帳下光啓中禦梁軍於慎縣遇單  
騎按槊率先破敵以伍長遷馬軍副指揮使從平秦畢  
趙鐸孫儒皆有功遷淮南馬步諸軍都尉累遷常州刺  
史天復三年安仁義以潤州叛夜襲毗陵仁義善射諸  
軍多畏避遇背城逆戰仁義喪師自是不敢東顧天祐  
中宣州王茂章奔越乃以遇爲淮南行軍司馬宣州團  
練使徐溫專政遇不能下之常言曰徐溫何人吾所未  
識溫怒命柴再用將兵送王壇代遇不受命再用攻其  
城逾月不克時新王遣典客何堯說遇曰公本圖反請

斬堯以徇本無反心可隨納款遇聞王命遂開門委命  
溫族之孫仁義方嬰爲人匿之而免李昇秉政以仁義  
爲縣令

劉金

金淮陰洪澤人光啓中江淮兵亂從鄉酋李章保曲谿  
章死金代有其衆行密營廣陵金盡以其衆來附破秦  
彥金有力焉文德初從攻趙鐸於陵陽明年金度鐸必  
遁思以計擒之因僞與鐸通好約爲外應鐸大以金帛  
爲遺復夜迎金入卧內許妻以女金歸營慮鐸兵盛出



不能制乃遣人臨城大譟云劉郎不能與爾爲女壻也  
鏗聞之沮喪果宵遁大順中孫儒寇宛陵行密遣金拒  
之屢破儒軍以功授滁州刺史行密破鍾離移濠州刺  
史未幾遷團練使天祐二年卒子仁規嗣仁規娶行密  
女渥襲位遷過口兩城使乾貞初授清淮軍節度使

秦裴

裴慎縣人少驍勇頗好獵以鷹隼爲事嘗云天上黃鷹  
地下黃金餘不足貴也行密起合肥因隸帳下大順元  
年奏授檢校左散騎常侍行密據廣陵以裴知楊子縣

有虎入縣郭裴親殺以獻行密召褒賞之裴曰此衆共  
殺非能獨制也行密歎曰勇而能謙必享富貴歷高郵  
無錫令俱有能名乾寧五年率兵破越崑山鎮以千兵  
守之錢鏐遣顧全武引萬衆來復裴援絕全武以檄說  
裴裴封函納款全武頗自負召諸將聚觀全武會爲僧  
發函乃佛經一卷全武大慙裴戰無虛日士卒多病傷  
死未幾糧盡告降錢鏐預設千人食以待之及出土卒  
不滿百鏐讓之曰軍孤衆寡何苦相拒裴曰但事君盡  
節死而後已今食盡歸命非本志也鏐大賞之因熟視



裴曰君有藩侯相他日必歸君餘勿爲念裴在越三年  
寂無歸耗忽一日裴遣人告行密遣李神福攻越臨安  
鏐遣顧全武方宇救之爲神福所擒明年行密送全武  
及宇易裴以歸天復三年從李神福攻鄂州荆南成汭  
乘大艦來援裴率兵泝流逆戰汭敗溺水死又攻田頔  
衆於吉陽磯以功授諸軍都尉從劉存攻夏口破之加  
昇州刺史天祐三年洪州鍾傅率州人立其子匡時江  
州刺史延規傅之養子忿不得立以其郡納款因授裴  
西南面行營招討使攻匡時至蓼州時軍欲限水爲柵

裴不聽匡時果遣將劉楚據之諸將相顧失色俱咎裴  
裴曰城中驍銳惟楚耳若令總衆拒守此城何由卒破  
吾固留此要害以謀致之旣而分軍晨出盡銳破柵旣  
擒楚方傳於城下未幾城陷擒匡時以獻諸將皆服其  
智號令嚴肅兵士無敢殺戮洪之士卒俱來就營求其  
戚屬爲出府帛贖還之洪人感悅授洪州制置使張顥  
用事慮裴爲變急召歸及湖口遇鄂帥劉存與潭軍戰  
沒復授裴鄂岳觀察使會重午裴宴諸將而潭人入寇  
裴遣弟師鐸師虬乘戰艦先往裴食訖登黃鶴樓以望



乃以平頭舫顧小校曰但乘此卷旗奪潭人船以戰及與師鐸軍合乃建大將旗潭人聘貽裴因擊敗之六年入覲因求歸故里以民禮謁縣宰見里中故老必拜坐以少長爲齒九年加武昌軍節度使遇疾求歸至湓中卒年五十九裴在治七年積軍儲二十萬開青山大冶公家仰足

馬珣

珣廬江人少驍勇有機畧初以貨財商於江都會秦畢圍城乃歸鎮鄣軍畢師鐸於城南立高樓以望城中呂

用之患焉募壯士摧其樓珣應募夜半獨仗劍入賊營倒之用之厚賞遷十餘級行密入城聞其名錄爲偏將與朱延壽相友善乾寧初授珣舒州刺史移守漣水三年梁將朱友恭圍瞿章於黃州命珣率兵援之黃州陷戰不利與張訓呂師造成知進石率等收散兵三百人自黃州間道緣分寧絕山谷而東道經撫州危全諷聞其來布四壘於路壘皆萬餘人珣語諸將曰彼謂我可坐縛也今與諸將擊其中堅逐其軍帥取其資而食其穀可以歸矣會夜擊全諷之壘大破之全諷僅免乃飲



宴於賊營擇其利兵而用之明日廣張旗幟揚麾伐鼓  
從山直下衝其連營鋒若雷電賊皆潰走珣凱唱而歸  
謁行密言其戰狀行密罵之曰懦監子何不遂據其城  
珣拜謝不敏珣滑稽好妓樂歌舞雖出師登騎俳諧不  
輟旣而臥疾謂所親曰若患愈當乞師數千可以蕩平  
西南夷獠俄而卒眾惜其智勇部下將校見其二子無  
不感慨申敬朱延壽錄其孤而字之延壽敗行密收其  
二子給與第宅

劉存

存陳州人善拳勇從行密起合肥破秦畢趙錐皆有功  
孫儒入寇身先苦戰爲賊斷足三指而戰不輟翊日行  
密出城與儒戰存請先登行密諭以指痛不許因求皮  
履裹足而往是日平儒以功遷壽州馬軍都尉乾寧中  
預破葛從周於溍河遷舒州刺史改團練使天復中副  
李神福攻杜洪於江夏會田頔叛遣將汪建王壇率舟  
師泝流而上存與神福下瀝池磯逆戰爲流矢中目存  
戰自若建敗存殺獲居多四年復攻江夏時神福病歸  
存代爲招討使引十數騎巡城憇於高崗張樂命飲酒



酹鄂兵大至存以旂向江三招而止鄂人望之仡然有  
頃自退軍中服其膽畧存急焚鄂城樓梁援兵將突圍  
而出諸將欲急擊之存曰擊之賊必復入復入則城愈  
固矣不若聽其遁去諸將皆曰善是日城陷擒杜洪父  
子斬於廣陵市以功授淮南行軍司馬鄂岳都團練使  
天祐三年率舟師攻潭州大雨不止軍回至瀏陽爲潭  
人所敗執存以歸馬殷親解其縛欲授以官存大詬曰  
汝昔歲宣城潰散偶漏我鋒刃今反欲臣我耶殷知不  
可留乃斬之唐保大中邊鎬平湖南遣使就墳致祭贈

宣武軍節度使武衛上將軍

李簡

簡上蔡人有膽勇資質瓌偉始隸陳蔡軍中趙鏗選武  
幹之士因任爲帳下親信龍紀初鏗爲行密所圍糧盡  
將逸簡給守門者得出因奔行密補黑雲隊長大順二  
年孫儒寇廣德行密將逆戰會夜屯於行密柵及旦儒  
軍圍之數重率百餘人挺身突戰自外破柵援行密以  
出遷黑雲都指揮使乾寧二年從攻濠州濠水深濶簡  
手搴重甲口銜大刀先渡踰壘破其關鍵擒刺史張遂



以獻從攻壽州加淮南右廂馬步軍都虞候先是江都多盜令雖嚴莫能禁止及是爲簡獲者必詢其部分姓名所盜之物盡黥於面於是寇竊皆息三年從田頵破蘇州虜刺史成及從行密破龐從於青口敗梁軍於淖水河副王茂章援青社從臺濠圍田頵於宣州皆有功簡本姓陳旣貴欲復其氏行密謂之曰天下皆知有李簡何知有陳簡也以是不易渥襲位王茂章將以宛陵叛命簡率衆攻之茂章聞簡至率衆奔越改楚州團練使杭人屢寇無錫以簡爲常州刺史改鄂岳觀察使天

祐十二年授武昌軍節度使武義初加鎮西大將軍襲復州破之俘知州鮑唐以獻乾貞二年加西南面招討使入覲卒於采石江年六十九簡鎮上游之地十餘年重關洞啓敵人不敢侵軼然忍而好殺又非法重斂鄂民之高貲者無不破產時論以此鄙之

### 柴再用

再用蔡州汝南人性至孝七歲遇龐勛亂舉族避地祖訓鼓不能去唯再用獨留侍賊見而去之以是大爲鄉里所異及長沈毅有斷面黑如鐵人號爲柴黑子會秦



宗權召募驍勇再用以騎射應選時軍令亡馬者斬一  
日戰同藉韁而臥寢既寤而馬逸再用追之遇賊於林  
中環樹而射一發人樹俱貫賊畏走遂奪馬而歸光啓  
中從孫儒攻廣陵再用本名存嘗與軍中小校結爲死  
友會有告小校謀反者儒斬之執再用至儒問何故反  
再用不對旣伏質又問之始對曰某與彼相結爲死友  
則某反矣公旣誅之復何問焉儒奇之曰汝果不反吾  
再用汝因令改名再用儒敗歸行密授先鋒馬軍指揮  
使乾寧中朱延壽辟爲衙將因遷壽州團練都押衙敗

梁兵於壽春遷團練副使從延壽平劉存於弋陽授知  
光州軍州事一日大震電家人皆伏匿再用當戶坐不  
動俄見青襦袴者四人昇再用所坐牀出庭中復大震  
屋楣折有龍出焉梁兵寇光山再用擊走之以功遷光  
州刺史天祐二年梁祖平趙匡凝於襄漢乘勝畧淮上  
遣使謂再用曰苟以城降遷爾蔡州本郡爲賞再用乘  
圍而拜曰此州城小衆寡王若先下壽州回當自送款  
梁祖信之攻壽州不拔而返再用襲之斬首二十餘級  
以功加檢校太保渥襲位遷楚州刺史俄授淮南左廂



步軍都指揮使越人寇東洲遣再用率兵禦之賜長稍  
五十戰敗艦破水滿再用爲長稍所泛得不溺家人聞  
敗飯千僧爲禱再用戰歸取其飯召麾下以犒之曰此  
輩濟我佛何力之有十一年袁州劉崇景叛引潭將許  
真爲援令再用攻之近城有萬勝岡再用欲奪之每旦  
出師岡下不與戰袁人頗怠一日列大陣岡南崇景望  
之氣奪因出戰再用躍馬徑入陣中斬首數十袁人大  
敗崇景棄城而遁武義元年破越軍於無錫遷鎮西將  
軍領天平軍節度使未幾移鎮武昌改德勝軍節度使

加中書令卒年七十二再用寬厚淹雅有儒者之風好  
讀左氏春秋未嘗省視厨廐寮屬白事有不如意但對  
之假寢諸子娶聘必擇平昔舊族史官王振請述戰功  
以補方冊再用曰鷹犬之效出自偶然何足紀也累歷  
藩鎮敦尚儉素車馬導從不過十人亦一時之良將也

陳璋

璋潁川人少橫恣不羈歷事諸帥俱無成乃歸行密未  
幾復委質於錢鏐景福初授杭州武勇都指揮使改鎮  
海軍踏白使乾寧中領賓州刺史從平董昌詔賜佐忠



去僞功臣天復二年鏐將許再用叛據外城召田頽爲援頽將樹柵於杭州咽喉之地鏐乘圍觀之大懼出金彩十輦募諸將有能奪其地者與之仍以頽爲賞璋應募選饒健三百假護軍白馬以出免胄馳擊往返者數四竟奪之鏐大喜飲之巨觥卽授璋衢州刺史與軍校葉讓不協因斬之與睦州陳詢連衡復歸欵於行密鏐以兵圍其州踰月不能出行密遣周本援之拔璋盡室以歸天祐二年行密遣陶雅平婺復授璋衢婺州諸軍事充都招討副使會王茂章叛雅棄其地攻璋池州

團練使署淮南節度副使越將張仁保陷東洲授璋水陸行營都招討使擊仁保於海曲奪戰船三百艘盡復東州舊地復乘輕舟入松江九谿偵還越師大集團之數重璋獨射舵工心目皆應弦而倒因奮銳衝擊長圍遂解軍回泊洞庭見橘林意欲除之謂士卒曰若食膾用此木研酸酪不假他物自有香辛味諸軍皆爭取樹立盡九年以舟師破岳州擒刺史苑玫荆人潭人會於江口邀璋歸路璋乃方舟並貫夜過其所敵人後出已無及矣璋每入敵境或晚泊戒士卒整舟檝待令下當



行此必宿軍之所也若移帳下岸修棚習射及夜多前  
去越兵寇上饒璋引兵侵蘇湖上饒之兵乃解乾貞元  
年加鎮北大將軍領平盧軍節度使溥遣王彥章苗湏  
舉兵西伐璋謂嚴可求曰朝廷攻湖湘何不用璋與周  
本彥章與湏可當其偏裨耳其後彥章果敗三年加使  
相大和二年改鎮東將軍充寧國軍節度使遇疾歸江  
都求醫至江陽縣卒年六十五

侯瓚

瓚字信美城濮人黃巢聚兵於曹濮瓚從之時年十六

巢陷京師瓚逃歸鄆州時僖宗幸蜀徵十道兵討巢朱  
瑄以鄆兵應命瓚爲偏將預行尋復與諸道兵伐秦宗  
權皆以勇果聞頃之隨瑄弟瑾襲兗州瓚與瑾逆殺齊  
克讓破宿州瑾據有兗州瓚爲爪牙梁祖攻兗州力戰  
以却梁兵梁祖圍時溥於徐州兗鄆兵救之不利溥死  
梁兵遂攻兗鄆戰於城下者數年長圍三合而三却之  
時瓚常在瑾之左右大小數百戰隨瑾搏擊馳突出入  
敵中殺傷不可勝計乾寧四年隨瑾與太原將史儼掠  
徐泗瑾將康懷貞以兗州叛瑾無所歸與瓚等率兵數



千走海州遂來歸行密授瓚衙將是歲梁祖大舉兵伐吳龐從古聶金率衆入自青口葛從周以精甲圍壽陽江淮大恐行密以兵萬二千會戰於青口時兵起倉卒加以陰寒戰士皆攘食飲雪而行甫及梁營則豎戈植足鬪志未決瑾與瓚率五十餘騎潛濟淮入自壘北舞槊而馳囂聲雷沸梁兵皆殞眩不能舉遂斬龐從大將繼之死者大半鳴鼓西行破葛從周於壽陽沉其卒萬餘人於淠河梁人大震瓚功爲多授左右隨從騎軍副使隨王茂章救王師範於青州破梁兵五萬餘殺友寧

瓚復有功從周本攻蘇州戰於黃天蕩從徐溫却王景仁於壽陽逐劉崇於兗州朱瑾救徐州之圍及攻潁州瓚皆預戰累授滁州刺史大和三年卒年七十

朱景

景壽陽霍邱人少豪猾驍壯有胆畧爲邑中所服行密得淮南以霍邱地界南北盜賊交會難可防限聞景之勇爲遠近所畏故以委之且伺北鄙之奔突景招合無賴年少得絕技者百餘人撫馭之晝與捕獵暮分巡警月餘而材技彊力無有及景者以是服從如一公淮羣



盜莫敢犯之梁祖聞其名命寇彥卿率勁騎三千襲霍邱圖取景且諭梁祖之意令降景率其徒戰於邱墟林澤中射死者無數彥卿兵折力殫而去康懷貞之至復爲景所困王茂章來寇度淮水可涉處立表識之景易置於深潭水中立表浮木之上茂章軍敗望表而涉溺死者大半積其尸爲京觀後破李進金何軫涉騎數千尋拜滁州刺史移光州刺史卒於任

張崇

崇廬州慎縣人少以驍勇隸軍籍光啓中始補戎職從

行密破趙鏗有功乾寧二年行密攻蘇州崇爲越人所獲行密欲嫁其妻妻曰崇忠孝必不負公請待之未幾崇果返以爲諸將都尉遷蘇州防遏使越人攻蘇州崇從臺濛敗越兵於小白天復中安仁義叛崇與茂章率兵攻之擒仁義以功授常州刺史累遷廬州團練觀察處置等使天祐十一年加檢校太傅光州軍校王言叛崇討平之授平南軍節度使武義元年累加安西大將軍梁祖遣將合湖南兵攻荊州以崇爲應援招討使引軍攻安州降其騎兵二百而還遷德勝軍節度使加中



書令大和中封清河郡王卒於治所年七十二崇殘酷  
暴斂泐人畏之嘗入覲議者咸言不返鄜市少年皆將  
頤相慶崇歸聞之因斂捋頤錢數萬貫尤好使酒殺人  
重掌奏刀鎔每謂左右曰吾醉慎勿令鎔出一日醉甚  
三召鎔至竟殺之詰旦召鎔左右曰已殺矣崇大悔取  
其首視之揖曰罪過員外其輕人命如此頗信鬼神家  
人求以厭息崇者先是后土廟塑韋安道配座乃遣巫  
女詐云天上謫后土與公爲偶崇往視之巫女潛熟異  
香以爲后土至矣崇乃命樂對像酣飲一夕家人竊其

兵器盡寘廟中巫女報曰列仙不喜殺戰故遣六丁取  
至公不得更用此傷害崇因是大爲改悔歷藩鎮二十  
年掠下以奉上每歲一入覲輸貢絡繹國中執事無不  
受賂故任其肆虐凌下保全祿位終身恣橫耳

王綰

綰廬江人勇敢有謀光啓中始從行密破趙鐸下蘇濠  
累有戰功署行營諸軍都尉兼漣水防遏使光化三年  
青州戍將陳漢賓殺海州刺史牛從義歸欵於行密行  
密命綰與張訓率勇士二千乘勢來附襲之漢賓設備



不暇果出迎謁遂入府中諭以利害漢賓乃解甲聽命以功授檢校左僕射是歲青州王師範告沂密內叛授綰海州刺史兼沂密兗鄆諸州副使與臺濛攻密州下之將擊沂州覘者曰城中偃旗臥鼓寂若無人綰曰此必有備而援兵近矣諸將曰密城旣下沂易與耳綰不能禁但於茂林設伏以待果攻沂不克援兵具至師旣退爲沂兵持其後綰伏兵擊之沂人大北未幾代臺濛爲海州刺史天復三年改漣州制置使天祐中復刺海州就加平盧軍節度使明年改定南大將軍知處州防

禦使谿洞民多爲盜至皆平之順義元年授百勝軍節度使召歸乾貞初卒年七十二

王稔

稔廬州人少驍勇始以騎射隸行密帳下累從征討有功乾寧中梁祖遣將葛從周討揚州稔與柴再用率兵禦之稔以六騎登高山覘梁軍爲梁軍所圍候者望見之請以救兵往再用曰王稔辦事不須憂也稔與其徒解鞍而臥梁兵不敢上會暮圍兵漸合稔乃走依林木轉戰而行因是解去時亡馬令峻遂重襲梁兵奪馬而



還軍中壯之袁州劉崇景叛湖南將許貞率衆來援貞  
單騎求鬪稔獨援長槊逐走之袁州平以功授滁州刺  
史又從徐溫破寇於山南遷壽州團練使未幾授清淮  
軍節度使稔好儒學性寬厚褒衣博帶有同儒者先是  
壽春人多尚武復警夜至嚴稔至唯閱經籍下帷肄業  
通宵無禁不數載鼓篋待問者四境鱗萃每講肄開必  
饋以束修旨酒鄉里薦舉歲常百餘人稔多力每選二  
勁弓弦加兩耳分手前引雙滿者數四乾貞三年歸授  
左右雄武統軍卒年六十六

李厚

厚蔡州人乾寧初歸行密爲黑雲隊長破濠壽有功加  
檢校兵部尙書改隸朱延壽將戰會立新軍每旗以五  
伍爲制遣厚以十旗擊其西偏不克而返延壽將斬之  
厚曰彼衆我寡願更益師以往苟不勝敵死未晚也乃  
增以五旗厚力戰梁人亂延壽乘之遂大敗行密聞之  
召歸授黑雲都指揮使天復中從臺濛破宣州天祐三  
年以兵援宜春深掠越境師還以功遷黃州刺史溥襲  
位授泰寧軍節度使同中書門下平章事卒於金陵年



六十

陳知新

知新廬江人從行密起兵攻畢師鐸孫儒皆有功屢以親軍攻定南北諸郡多立奇績累授先鋒指揮使天祐元年率兵攻邑陵破其水柵逐楚將許貞盡收其地拜岳州刺史三年加團練使是歲從劉存大舉師伐湖南會天大雨旋至瀏陽江爲楚兵所襲存與知新戰敗俱被擒楚王馬殷親釋其縛且慰勉之冀爲己用知新叱罵曰吾豈能負楊公而反事汝耶殷知不可留乃殺之

家悉陷敵

朱虔祐

虔祐潁川人少多力善戰初爲義興令行密惜其材召居帳下常率衆居前從王茂章援青州去爲前鋒歸則殿後我軍背險虔祐以五百人當之追兵大至茂章亦留解鞍而寢虔祐促茂章亟去自與梁人戰殺傷無數日暮兵盡被擒士卒無求生者以故我軍行遠追兵不能及梁人執虔祐見太祖太祖壯其事欲釋之虔祐請死不得瞋目大罵被害行密厚恤其家後數年嫁其妻



九國志卷一  
詰且行矣其妻沐浴禱之曰王愍我窮獨恐終不能自  
存嫁我於某氏嗟乎今日猶君之妻明日他適矣君忠  
烈若是歿豈無神遂棄我耶是夜無疾而卒夫忠婦義  
如此

九國志卷一終

九國志卷二

宋路振撰

吳

劉信

信字興遠兗州中都人少豪勇善騎射始陷蔡盜許勅  
軍中勅敗自滁州奔於行密及破秦畢頗著戰功大順  
中行密與孫儒對壘一日召信受事信醉不能起行密  
罵之信出投賊左右請追信行密曰信醉耳豈負吾者  
耶明日信果返孫儒平以功轉騎軍副指揮使從破濛



泗遷滁州刺史改左右隨從馬軍都尉王師範據青州  
密人叛師範求濟師行密遣臺濛率兵破之信先登破  
敵冒重創及青人犒師先求白甲軍增其賞蓋信所部  
兵皆鐵鎧也天祐六年袁吉信撫州結潭人將復豫章  
改信鎮南軍節度副使率兵敗潭將苑玫於上高遷袁  
州刺史危全諷新破其將黎汾王藻聚殘黨爲盜南城  
間信盡破之一郡遂寧十一年授鎮南軍兩使留後劉  
崇景以袁州叛信擊走之授鎮南軍節度使信爲治苛  
猛民流言將反會王祺率舟師南上信意其圖已乃乘

小舟解其冠詣祺請罪祺大驚謂曰奉命討譚全播於  
南康請公駐吉州以警潭人非他也時虔城險攻之久  
不克祺以疫死遂改信爲招討使全播懼因納款信受  
其質而還徐溫方執政聞之大怒杖其使者信子彥英  
時爲親軍校溫令將三千人往援之溫戒之曰汝父據  
上游之地擁數萬之衆取一小郡不克而還是反也今  
授汝此兵可往助父反信聞之大懼卽返旆疾趨克其  
城而還先是有譖於溫言其逗撓故縱全播至是信自  
獻捷於江都溫大喜復遣還鎮十六年吳王開國加信



征南大將軍後唐莊宗卽位遣諫議大夫薛昭文冊閔  
王假道豫章信勞之謂昭文曰皇帝知有信否昭文曰  
主上新有河南未熟公之名信曰漢有韓信吳有劉信  
異代其人也因指牙旗銀首舉卮酒以屬昭文曰射中  
此願公飲一箭而穿之觀者無不稱快信親吏吉况輩  
聚歛財貨置積廳事日納銀滿其中莊宗伐蜀温恐信  
爲變急召歸江都爲左統軍温卒又傾心事知誥復歸  
鎮明年卒於治所年七十信將上章請立廟於洪州許  
之

馮宏鐸

宏鐸漣水人少與張雄友善雄以事爲吏所抑因與其  
徒亡入海爲盜宏鐸隨之聚衆千人自號天成軍遂據  
上元雄卒宏鐸繼其位詔水軍於金陵樓艦之盛聞於  
天下大順元年詔復以上元爲昇州命宏鐸刺史遂增  
版築大其城爲戰守之備行密定淮浙因請歸附時田  
頽在宣州常欲窺伺宏鐸介居二大國之間又郡中數  
有妖怪居人相驚恐負抱嬰孩奔走諭之不可止宏鐸  
心不自安遂悉衆南上其日淮口大風發屋拔樹大石



巨木皆飄于空聲言將討豫章實欲襲顏顏自帥舟師  
與戰于昌山宏鐸敗沿流將入海行密自出東塘邀之  
先使人謂宏鐸曰用兵者勝負豈有常哉今衆力未損  
公何憂一郡而欲自屏于海外吾府雖小足以容君之  
衆使無失所若欲淮南節度吾亦當讓君捨此而去無  
他也宏鐸左右聞之皆哭于是聽命行密乃升宏鐸舟  
執手慰勉一軍皆歡呼遂以宏鐸歸署揚州節度副使  
館給甚厚將吏皆分部安堵嘗與行密同祀漢高廟有  
二鳥鬪于樹行密命射之宏鐸引弓伺便一發而二鳥

俱墜天祐四年卒

### 公鐸

鐸字聲遠唐相耽之嫡孫生于上蔡遇亂爲秦宗權愛  
將宗權暴虐不軌鐸諫之不聽反見疑懼禍及乃挈家  
夜與屬卒千人出奔宗權嚴兵追之鐸且戰且走數日  
乃渡淮遇故人馮敬章導之襲蘄春破其城推敬章爲  
師鐸爲牙將塹城厲兵以自固行密命朱延壽攻之鐸  
方出獵延壽潛軍掩至圍其城鐸走還度不得入以兵  
伏林中選士二人衣皮夜入延壽所掠羊羣中因得入



城約城中夜半開門舉火為應再以羊皮復命鐸如期  
領兵趨城南門門中火舉乃力戰突圍得入延壽知其  
狀驚曰吾恐其潰圍而出今反潰圍而入如是則城安  
可卒平乃以鐸報行密令召軍中與鐸有舊者持誓書  
金帛與之和仍令延壽與之約婚小將柴再用應召而  
行鐸乃請盟延壽以妹妻其子匡浩行密復授鐸左監  
門衛將軍乾寧二年加壽州左右軍光化二年授檢校  
右僕射天復三年加金紫光祿大夫檢校司空授黃州  
刺史天祐三年移光州刺史七年卒于治所

危全諷

全諷臨川南越人世為農夫初生赤而毛醜狀駭人父  
母欲勿舉其姊保護之僅而得全及長體質明秀豪勇  
任氣乾符末所在寇亂乃招合同縣少年即其居為軍  
營鄉里賴焉時安南都護謝肇受詔安撫江嶺聞而嘉  
之補為討捕將表加憲職賊帥黃天感據龍安鄉朱從  
立據石牛洞皆竊稱名號官軍屢敗肇遣全諷討之期  
年悉平中和五年黃巢餘黨柳彥章攻破臨川逐郡守  
大掠而去全諷遂入之詔即以全諷為撫州刺史郡署



及郛郭焚蕩畧盡乃悉心爲理招懷亡散興緝圯壞不  
數年完復如故時南平王鍾傅亦乘亂據有豫章朝廷  
因命爲帥諸郡亦多自立者皆不能恭承節度而全諷  
最強尤驕傲不遜遂爲勍敵久之傅不能忍自率兵討  
之旣薄其城而城中夜失火士民驚亂諸將請急攻之  
傅曰君子不逼人之危乃掃地而祭曰全諷之罪無害  
于民烟焰遽止天之惠也翌日全諷聞之遣使謝罪聽  
命請以其女嫁傅之長子匡時傅許之乃盟而還由是  
稍修支郡之禮然豫章之人常畏之傅卒軍中以匡時

爲留後全諷曰聽鍾郎三年爲節度吾當爲之旣而我  
師圍豫章全諷不能救及城陷乃謀東兵時宣州刺史  
王茂章叛入越假道臨川以之梁問全諷曰君欲大舉  
願見君之將士以卜濟否乃陳師于野與茂章登城而  
觀之茂章曰衆凡幾何曰十萬茂章曰淮南有三等將  
如公此衆可當下將爾益更益十萬乎全諷不聽悉衆  
屯象牙潭自稱江西留後旁郡皆以兵資之湖南馬殷  
又遣將高安以爲之援軍勢甚盛豫章大恐將軍周本  
攻象牙潭大破之擒全諷于陣諸軍皆潰楚撤高安之



圍而遁于是克定八郡之地送全諷維揚親詰之全諷不答初行密之攻趙鏗遣使通聘于臨川全諷報禮甚至糧運兵器皆取給焉至是以舊恩釋之先是潤州刺史安仁義築第於邗溝之西因以賜全諷資給甚厚天祐六年以壽終諸子隨才敘錄全諷敬愛賓客善撫士民頗有巧思多所興創今城郭館署皆其遺構也

譚全播

全播南康人昭宗末嶺表寇亂全播與鄉人盧光稠相與聚兵謀署首領衆推全播怒曰諸君舉事必望成功

須藉良帥盧公軀貌堂堂真諸君帥也衆唯唯未定全播拔劍三擊庭樹曰不從令者與此樹同乃立光稠而全播爲謀主所向多捷兵勢漸盛遂破王潮之衆入據虔州推光稠爲兵馬留後全播分掌城中兵天復三年與潭人共伐番禺下韶州潭人不利乃引還光稠命其子延昌守韶州其弟光睦戰敗奔還潮人乘之伏兵四起大破之擒其首將鄭廉遂從光牧圍潮州番禺救之乃引還劉巖劉隱以廣州之衆伐光稠以報韶州之役旌旂相繼數十里圍城十餘里光稠大懼全播曰吾諳



劉公易與耳無足憂也光稠喜曰虔與韶昔與君所共  
定也此日之事非君不能辦之於是治戰場於城南告  
戰期於劉巖巖令諸軍曰戰之日勿殺虔兵悉可生擒  
之全播選精甲萬餘伏於隍壑邱嶇之間與老弱五千  
鼓行而前數戰乃退巖縱兵長驅伏發巖等大敗單騎  
遁免斬首萬餘級光稠議功全播悉讓諸將而不受自  
是光稠大歎賞之俄有疾將以符印授全播不從光稠  
死延昌自韶州奔喪全播立事之延昌好游獵荒傲無  
度大將黎球俟其出獵閉壁門而殺延昌於城外球以

全播不與已同謀將害之全播請老閉關不出後球方  
欲蒞事見延昌持彈叱責之球中丸而死衙將李圖復  
知州事全播懼禍稱疾篤杜門李圖疑之與議親姻多  
方以覘其動靜全播應覘爲狀終不可識廣州聞全播  
之病乃北侵陷韶州李圖卒其子不肖閉子城以自衛  
州人無歸相率詣全播第請爲帥拒之不可遂從之遣  
使詣梁俄授萬勝軍防禦使五嶺虔韶二州節度開通  
使檢校太尉開國侯在任七年人物殷盛俄而徐溫命  
劉信伐之信以大衆填其城濠全播令人潛爲地道運



其土濠深如故信以爲神莫之測也攻擊萬端不能尅  
遣使說之令歛服全播請從溫聞之怒曰信以十倍之  
衆不能下一城何以取威敵國命回兵攻尅之擒全播  
以歸授左威衛將軍領虔州如故卒於江都年八十五  
當盧光稠之未舉南康先有謠言曰盧破黎頭出李子  
始花開潭深魚正聚楊柳西邊栽旣而光稠有南康至  
于延昌而破黎球繼球死李圖繼之全播方盛柳耆劉  
也而楊氏命劉信攻取之一郡之地何冥數之豫定若  
是乎

### 李濤

濤趙郡人祖遠唐杭州刺史父逸壽安令濤涉書史會  
唐末四方盜起乃投筆從軍光啓三年秦彥囚高駉濤  
從行密舉義列八寨維揚西彥盡以步騎背城求戰俄  
而彥軍已破一寨諸將以兵勢相懸宜堅壁勿出濤拂  
然曰今以順伐逆豈論衆寡設令欲退將焉歸濤願以  
所部爲前鋒請觀破賊行密壯之遂出戰果敗彥軍自  
是無復敢出濤以功遷騎軍都尉渥襲位授和州刺史  
初行密旣率張顥陰有異志以都統符印送宣諭使李



儼行事嗣王意未決一日諸將共議四座畏顥無敢言者濤曰都統符印是昭皇御翰所賜王父子承襲用在不疑苟付他人中外安仰諸將以其辭正皆伏羲顥獨默然投袂而去渭襲位遷吉州刺史十年授行營招討使攻越臨安濤敗陷於越順義元年吳越通好杭人厚禮歸之授左雄武統軍加泗州防禦使遷寧遠軍節度使天和四年卒年七十二

鍾章

章字憲明廬州合肥人少不拘細行雄果有四方之志

中和中行密據合肥召置帳下累從征討皆克獲有功天復三年朝使李儼至行密得承制拜授以功歷左監門衛將軍天祐五年張顥弒渥將出徐溫守潤州以圖自立溫與嚴可求謀非章不可除顥章知之因選士三十人夜集軍舍椎牛享之刺血而飲以爲誓溫謂曰吾有老母不若且止章曰斯事一言既出寧可中輟耶明日章與姚克贍殺顥於衙堂遷檢校尚書左僕射左衙副指揮使從周本攻越州拔衆夜歸越人襲之章以二百人散樹旌旗於菰蒲間越兵退去絕糧三日章壯氣



無衰章自以除顥功大賞薄會與言爭握槩因譁語較軍功以及之温聞而歎曰斯固吾過也明日加章滁州刺史滁民有訴章者章詣金陵自理温過謂之日無事為理已改授公光州矣章遂之任未幾遷壽州團練使會疆吏告章侵市官馬因遣王稔以巡霍邱為名往代章章歸中途改饒州刺史俄召歸金陵在郡二年加同中書門下平章事章多力嘗怒其家人其人匿避章愈怒因拉折鐵杵後卒於治所年六十二

朱瑾

瑾宋州下邑人也雄武倜儻有吞噬四方之志光啓元年汶陽曹全是遇害無帥鄆兵共推瑾兄瑄為留後瑾之季仲俱為列校明年兗州齊克讓妻女於瑾瑾伏兵仗假稱聘禮改服甲士作為昇夫而往親迎夜發卒殺兗州軍校王稠膚遂虜克讓詰且自稱留後三年夏秦宗權併兵攻夷門梁祖幾至不守會瑄援至合梁祖兵大戰城北瑾單騎嘗寇馳突往返當者無不披靡宗權敗走自是瑾與梁軍互為犄角屢破宗權朝廷以功授瑾兗州節度使未幾梁祖交惡於瑾遂成仇敵大順二



年冬瑾率兵萬人攻單父梁祖遣丁會禦之瑾軍大敗於金鄉景福初梁祖攻徐州瑾率全軍來援時溥擊梁軍殺其將霍存因席卷十餘寨乾寧元年梁祖親攻鄆瑄瑾合兵迎戰敗之於東河二年春梁祖將朱友恭攻瑾塹其城守之是時連歲交兵四郊無耕織瑄瑾勢蹙因間遣使乞師太原李克用假步騎五千濟河梁人退舍十月梁祖復親攻兗州塹圍之瑾單騎求鬪梁將無應敵者瑾兄瓊先以齊州納款於梁梁祖使瓊臨兗州說瑾瑾怒瓊無急難之義僞遣使告降梁祖自至延壽

門與瑾交說瑾謂梁祖曰兗城符印他人莫可付願得兄來付與旣而梁祖遣掌謁劉捍與瓊偕至瑾馬立橋上遙謂捍云願兄先來乃麾將士擒瓊徑入未頃城上大譟擲瓊首於外梁祖大悔因班師焉四年正月鄆州先下瑾亦糧盡與晉將李承嗣史儼求軍食於野梁將龐從奄至城下瑾將康懷貞率瑾子私以兗城送款歸不得入引承嗣諸軍將保沂州爲其將尹處賓拒關不納瑾狼狽將奔海上復追之迫乃渡淮歸於行密行密遣迎之於高郵待以殊禮立解所服玉帶爲贈授甲第遣



財帛鉅萬表瑾領武寧軍節度淮南行軍副使是冬梁祖遣將龐從大寇青口行密親征之令張訓以羸兵前導從意輕吳師貪奕棋不顧瑾請假梁人旌旗率騎潛濟突入從中軍營行密得引兵急渡爭破諸寨遂擒從斬之乘勝攻淝河軍葛從周敗走光化二年春從行密攻彭門移師侵宋梁祖屯睢陽以禦瑾會天大雨與瑾交綏而退天復三年授瑾東面諸道行營都統平盧軍節度使同中書平章事天祐十三年淮南小校馬謙李球乘酒脅衆挾渭登橋樓發武庫兵爲亂陳於門橋北

外衆屢却會瑾自浙西至惟引一騎視其坐起云此不足爲禍因返顧外衆推手一呼亂兵皆潰去遂擒謙是冬與行軍副使徐知訓率兵攻潁州梁人援至而解渭將開國知訓患瑾位加於己請以泗州建靜淮軍出瑾爲節度先是瑾因朔望令女妓通候問於知訓知訓淫縱強欲私之瑾心已不平復有是行會知訓夜張祖筵瑾中宵先起詰旦度知訓酒方困復留刺以去旣盱知訓果來謝瑾因延入室出其妻陶氏知訓方拜瑾以笏擊之踣於地左右自外突入殺之初瑾先繫二惡馬於



廡下及將圖知訓密令釋其羈繼馬果蹄嚙外人莫得聞變因斬首以出知訓從人數百瑾扼臂叱之俱辟易散去復乘知訓馬馳入府中訴於渭云今日爲大王除患渭曰此事吾不敢知因命瑾疾去瑾忿以知訓首擊柱詬渭曰懦夫安足與成事攜劍復出望府門已闔因踰垣折足大呼曰吾爲萬人除患今以一身當之耳遂自刎夷其族時年五十二

米志誠

志誠沙陀部人少嫻騎射以驍勇聞乾寧四年奔於行

密龐從寇青口葛從周寨溍河志誠俱爲前鋒連戰皆勝以功遷馬軍指揮使田頔叛於宣州志誠與臺濛敗頔於廣德天祐六年危全諷將伐鍾陵湖南遣苑玫屯上高以爲全諷聲援命志誠與王祺率兵破之十年從徐溫敗錢瑛於梁谿後又破王茂章於淮上十一年隨柴再用討劉崇景於袁州敗袁人於萬勝岡崇景棄城遁去遂入之先是袁人兒童聚戲穴地爲釜圈箸爲甑曰將柴米來至是果應以功加檢校太傅領泰寧軍節度使十五年朱瑾殺知訓攜其首入府中志誠聞之被



甲引其子并親從十餘騎至天興門問瑾所向聞瑾已死乃歸徐溫疑其助瑾遣使殺之嚴可求懼其不克遣人僞自袁州至告大破楚人諸將皆賀志誠亦入因伏壯士斬於棘門之下諸子皆棄市

翟虔

虔彭城人也乾寧初徐方將陷虔盡室南渡謁行密於廣陵及徐溫典右衛以虔爲軍佐屬張顥之亂溫與嚴可求陰計其事密遣虔往復傳道及誅顥虔有力焉因授子城甲仗諸庫院鈐轄等使天祐十五年朱瑾殺徐

知訓挈首突人府門時兵衛倉卒莫敢抗禦虔驅率散卒共閉關瑾以是不得出遂踰垣折足自刎而死曾米志誠引十餘騎問瑾所向聲言以襲瑾爲名虔乘圍謂曰瑾已戮矣何不急自歸營因是志誠遂返渭喜其應機却賊以瑾宜陵莊賜虔爲賞及吳國建復旌其勲授閤門宮城武備等使領光州刺史順義四年溥幸白沙對徐溫呼雨爲水溫請其故溥曰此是翟虔父名吾懼諱矣因言宮內諸王須索虔多阻限不時進納溫欲斬之爲溥救護而免黜於撫州未幾授行軍副使及廉使



九國志卷二  
五  
徙任虔知本州軍事七年卒年六十三

張可琮

可琮不知何處人中和之亂奔於江淮行密識其勇毅擢在左右破孫儒於宛陵先登陷陣稍遷列校時吳人初得宣城毗陵之地無錫居越人之衝患其攻擾天復中選可琮守之錢鏐忌其名棟驍將卒二千中夜襲之邑中大擾可琮閱兵得百餘人皆乘城疾戰越人驚潰而去吏士皆賀可琮笑曰彼衆我寡其勢未已方復勞諸軍一陣爾於是息燈火屏旗鼓若空邑然越人偵之

以爲宵遁果復至可琮約將士候其附城突擊大破之寇盡潰去方告於郡守李簡簡雖怒其不時告且壯其事列上其功後以徐溫之命掠東洲下之卽以爲制置使天祐中除江陰縣鎮遏使遂城江陰沙山之役可琮以江陰之衆供軍旅展斥候無闕謀徐溫喜之擢拜常州刺史大修城隍民賴以安順義五年卒年六十五

鄭璠

璠汝南人始事秦宗權後隸孫儒入淮南尋歸行密前後戰伐皆預行光化四年授左先鋒兵馬使是歲從李



神福攻臨安擒越將顧全武方宇等四十餘人遷左衙將天祐初王茂章征安仁義於潤州泊城陷中十餘創以功遷左先鋒都尉從攻豫章璠以所部發機飛火燒龍沙門率壯士突火先登入城焦灼被體以功授檢校司徒復從柴再用與越人戰敗及陳璋復東洲璠城而守之復會呂師造攻蘇州與之戰虜其次將陳綰璠左脇中弩幾死授蘇州行營都指揮使周本擒危全諷於象牙潭璠所部功多又攻新淦縣克而守之尋以張宣代歸復佐周本攻袁吉緣山疾戰悉收其巖壁焚之民

皆復業十五年從王祺劉信攻虔州克之授璠羅城使順義元年領饒州刺史六年知楚州率兵援汀州軍事乾貞元年就拜團練使二年授鎮南軍節度副使知軍府事大和三年授饒州刺史五年遷金陵行軍副使卒年六十六

楊彪

彪宿州人身長七尺餘呼聲如鐘侗儻有武幹善騎射行密見而壯之擢授衙內散指揮使渥嗣位潭人犯邊授西南面行營護軍副將謂諸將曰彼衆我寡未可輕



動乃守其要津以輕兵挑戰登高以望之見其麾下進退不一彪笑曰非勅敵乃縱兵出戰親射其首將殺之順風焚其艦溺殆盡凱旋擢授江寧鎮遏使徐知誥鎮潤州充都尉以從越人寇無錫東南大震知誥東征彪與陳再過領死士千人於路次弓弩忽發越人驚擾又竊賊號令以入其壘殺獲其衆明日又戰自旦及辰未決彪躍馬疾馳之越人遂退師還以功授殿直軍副使與郭崇分直宿衛徐知誥謂之曰郭崇猛而少機警宿衛之職唯爾是賴大和三年卒年五十二

陳祐

祐歷陽人年十七歸行密於合肥從入廣陵孫儒來襲吳師亂祐之卒伍獨成列泊入宛陵稍遷爲佾校時行密修貢於天子祐應募而行達於朝廷制授兼御史中丞從攻滁濠壽等州重甲先登戈傷身墜而復上敗龐從葛從周朱友寧皆預戰有功秦裴下豫章時宋思勅范師從陳鐔以兵戍之鐔等皆渥之腹心也張顥忌焉令祐以渥命往誅之三校皆勇士也顥既遣祐行甚憂之祐踰險輕行六日至豫章微服懷短兵入秦裴帳下



裴驚其來具告之故因責裴以不能制三帥而令有異謀裴懼未及對祐乃令召思勅等宴會及至則祐已與裴飲矣三校入見祐皆色變俄而酒三行祐數其罪悉叱而斬之以歸徐溫之誅張顥祐有力焉天祐七年越人侵無錫徐溫自征之祐率黑雲都尉以從諸軍未集祐告溫曰寇謂我勞頓而至未能陣也願以所部先薄之大軍見可則進溫從之祐詭道以出賊後會大軍夾攻大敗之十三年溫在潤州小將周郊詐稱役旋懷短兵入府多殺軍吏而衛士無兵仗拔武庫之槩出兵仗

授之以戰或有自後擊祐傷腦踣於地從者負之息於門下稍蘇時賊雖息府中尙擾升樓傳呼不能止祐舉首叱之衆皆投兵仗罷去溫手封其傷授黑雲都尉溫遷金陵制宮室府署命祐董其事以功加檢校司空大和元年授饒州刺史卒於任年六十五

劉權

權許州人少從軍於蔡州景福元年來歸行密人淮南隸田頽麾下累遷同州節度副使光化二年頽與越人戰權乘勝深入爲寇所得錢鏐見而慰之曰爾壯士也



吾終不以俘虜相畜洎通和縱之歸渥襲位補衙將渭  
開國以權侍衛勤肅授左衙副校檢校右僕射從周本  
攻蘇州回授右衙列校爲毗陵子城使率海船與越人  
戰勝充洪州都督長史領吉州刺史潁川之役授行營  
都虞侯時徐知訓爲帥而軍政皆委朱瑾梁將袁象先  
帥部騎救潁瑾晨興望西北皆昏黑知梁兵將至召權  
與議值天大寒權幅巾錦袍而至瑾問曰爾何職曰行  
營都虞侯瑾曰是職也動必爲諸軍見今氛興西北陰  
霾閉天此梁人至矣爾司斥候尙爲此服且軍禮何在

叱左右執之就戮知訓徒跣而往救之僅免時梁祖兵  
已至戰少不利乃引還及瑾殺知訓城中恐懼將從而  
爲變權出師而瑾自殺衆乃肅然徐知誥至自丹陽遷  
左右軍都押衙事武義元年領雄武大將軍六月從徐  
溫與越人戰於沙山洛社敗之俘其卒數千七月從知  
誥戰無錫大破越人二年卒

崔太初

太初淮西人父亮蔡州監牧副使太初身長七尺勇力  
過人中和宋以大刀長槊應募行密見而偉之召居帳



下歷壽州衙內副指揮使天復中田安將謀叛行密疑  
朱延壽與之交結太初累從延壽征討曾諫延壽及延  
壽擒行密嘉其意遷太初衙內都指揮使天祐十五年  
從徐溫破王茂章遷本州司馬權知壽州團練事先是  
壽春自乾符後守卒俱爲多謀彊力者據而後奏報以  
要恩及陳紹卒宣王遣王定持虛銜官告以往令度可  
授者與之定以軍政雖出太初而職在衙將甯審言之  
次因潛報太初曰詰朝若州之符印再至於君慎勿更  
讓明日召諸將齒先以符印置坐末以次第遞捧而上

及審言而止定曰王府之命非甯公而誰然合更相推  
以成禮也審言如教復至太初定曰唯公不可多讓乃  
麾其下位者俱令列賀復數日軍州無異議始以官告  
授之人有密譖太初常蓄鄉關之念者會徐知訓征潁  
州路出壽春且觀其意太初著烏帽草履徒步至塌山  
爲知訓馭馬十餘里知訓見其屈降前疑大釋太初不  
喜儒生多疑好察每通衢交會之所牆必置耳常謂人  
曰還聞牆有耳否又曰非牆耳乃吾也由是行路之人  
鮮敢偶語者召歸授右雄武大將軍加檢校太傅同中



書門下平章事守左殿直統軍太和三年卒年六十六

陳彥謙

彥謙毗陵人少負壯節有理繁治劇之才行密定江表  
召爲潤州司馬以幹畧聞徐溫鎮浙右以機務爲寄彥  
謙亦坦然不疑言行計從人莫能間溫欲居金陵問策  
於彥謙對曰金陵昔爲王者都今實近畿關輔也作鎮  
於彼其誰不往溫從之遷彥謙金陵大都督府右司馬  
管度外城府署三年而畢上經費之籍天祐十五年朱  
瑾殺徐知訓溫急召之謂之曰蛇豕雖亡枝蔓猶在令

就廣陵除其餘孽及梁祖卽位隴蜀建號彥謙勸溫諷  
渭建朝廷及更章服彥謙頗有力焉溫嘗閱帑藏見金  
帛委積因曰此三軍物吾豈敢有焉致此盈衍公之力  
也因授鎮海軍節度判官無錫之役未戰而溫疾吳越  
兵攻其帳我軍相顧失色彥謙卽引旗鼓詭遷於左其  
攻稍息及敗越兵遷楚州團練使諸藩郡歲時伏臘事  
獻賂遺溫悉令納之病溫親往慰問自調湯藥臨卒手  
疏十餘事首卽以用嫡嗣爲請順義五年卒年六十

高澧



澧越州人祖實唐武寧軍節度使父瑰湖州刺史澧爲錢鏐之將累功遷特進湖州刺史武義軍使天祐七年以受疑挈家屬二百餘口甲卒五千來奔授淮南節度副使澧嗜酒好俠殺人而飲其血日暮必於宅前後掠行人而食之一日醉在樓上王寬經其下澧召之登而命左右去其梯操鋌於旁而以酒虐寬寬爲所圖乃以大觴酢之澧皆推觴寬躍而取其鋌橫之於膝乃慢罵澧速以觴罰之澧辭不飲寬乃引鋌逐之澧環席而走叩頭乞哀併飲十觴臥不能興寬乃下樓徐去泊上馬

命以鋌還之十五年徐知訓爲朱瑾所殺徐溫遷怒誅之



九國志卷二終

九國志卷三

宋路振撰

吳

田頽

頽字德臣廬州合肥人博覽書傳容止儒雅雄果有大志少與行密同鄉及戍塞上情好愈密軍回俱遷入營主將中利二年行密圖有淝上頽首為輔翼光啓二年壽春張勣遣將魏虔率眾來寇行密使崔自審禦之敗復命頽往大破虔眾於楮城鎮三年從行密破秦軍于



九國志卷三  
維揚頽功稱最文德元年圍趙錕於宛陵明年夏錕糧  
盡舟出東溪乘瀑流以逸將奔淮南錕度行密皆步騎  
限水無從復至因泊永陽解甲登岸初頽疑錕將遁密  
造輕舟縱之至是追及錕奔不暇爲頽親執以獻奏授  
頽馬步軍都虞候檢校尚書左僕射是冬與安仁義攻  
杜稜於常州下之十二月復爲孫儒所敗大順元年秋  
頽屯浙右懼儒兵盛焚浙右營散於野二年春退軍黃  
池廣德與孫儒軍寨壘相望頽兵屢戰多北會夏大雨  
儒等多墊溺避水而歸是秋儒盡焚維揚復濟師廣德

十月頽率敢死士千人夜襲儒將張景思沈粲二寨破  
之擒粲而返十二月頽與劉威大爲儒所敗行密怒盡  
奪其衆儒遂乘勝逼城戴友規言於行密曰疆敵匝壘  
不用田頽恐非長策行密遽復起之明年六月盡破賊  
寨頽親與其下范文感等臨陣擒之秋行密歸淮海表  
頽寧國軍節度累遷檢校太保同中書平章事乾寧三  
年夏同安仁義破越之蘇州光化末馮宏鐸以樓櫓自  
將介守上元頽以厚利購得其工令速成大艦工曰馮  
公每一舟必遠求楨楠旣成數十歲爲用餘木性不禁



水非久必敗頽云汝但以此地木造之吾只圖一用不  
假多年爾因而急就天復二年四月果與宏鐸戰於葛  
山宏鐸大敗舉族奔淮海遂以上元地歸行密頽隨入  
覲會行密左右要賂者眾下及獄吏亦有私請頽愀然  
不懌謂所親曰斯吏亦欲吾下獄哉頽方求池歛爲屬  
郡行密復未之許頽意望素高由是愈不能滿及回指  
維揚南水門云此門不復經人矣初行密克定江淮方  
撫循百姓而頽與安仁義朱延壽等皆猛鷲驍勇以攻  
取爲務行密憚其難制每抑之是秋錢鏐遊臨安其下

許再思徐縮以餘杭外城叛召頽爲應鏐得夜從水路  
入保子州時頽圍之愈急鏐屢遣間使哀求行密行密  
亦以頽若得志杭越爲患必深不若存鏐別圖進取因  
召頽歸鎮鏐復輸錢二百萬貫以元瓘爲質頽始旋軍  
自是財富兵盛復以取杭越垂下爲行密所召乃與錢  
鏐和親反意遂決三年秋頽與潤州安仁義同叛初召  
其謀將康儒議多忤意行密因而間之遣使授儒廬州  
刺史頽果疑儒私納欵遂旋師先是行密遣李神福攻  
武昌及頽反行密急召神福旋師頽聞之復以兵襲上



元刼神福子承鼎遣喻意云苟見機從吾事平之後當分地以治別命將汪建以樓橈踵其後神福不顧叱左右射承鼎以誓諸軍明日大破建於吉陽磯額聞建敗自督親軍求戰神福收兵皖口際水爲堅柵是時行密別遣臺濛王茂章率步騎以往額復委舟師於汪建王壇自出廣德迎戰大爲臺濛所敗遂率殘衆遁保宛陵壇建聞其敗因盡以舟師歸欵於行密十二月額出外州棚疾戰橋陷馬墜爲外軍所殺時年四十六額母老行密哀而捨之初額與行密微時約爲兄弟渥涓俱以

子孫禮事其母額善撫將卒通商惠民復疎財愛樂文士時游其門者楊夔康軫夏侯淑殷文圭杜荀鶴王希羽晚年楊夔知額以兵賦自恃將謀爲變因著溺賦以諷之額終不顧以至於敗

安仁義

仁義沙陀人初事李國昌於塞上以過奔南河隸秦宗權軍中光啓三年擢爲馬軍指揮使從宗權弟宗衡攻維揚及宗衡遇害復奔行密行密得之甚喜盡以騎軍委之列在田頔上文德元年從行密破趙鏗於葛山與



頽攻杜稜於常州破之大順初梁祖遣將龐從率衆十萬至高郵孫儒盡衆禦之行密乘虛襲據浙右命仁義率衆敗儒將劉建鋒於武進儒復渡江陷蘇州自是與儒春夏鬪黃池秋冬戰廣德儒軍竟以衆勝圍行密仁義於宛陵時儒亦以久戰不決貽書仁義敘舊歎密欲令行密猜間之行密待遇愈至辟爲行軍副使依前馬軍都指揮使景福元年行密仁義及田頽背城晨戰儒軍大敗破五十餘寨以功奏授檢校尙書左僕射潤州刺史仁義蕃性好貨雖凋弊之後科歛尤急初儒之亂

士庶多奔豫章及諸郡平流者皆復行密皆以循吏守之唯浙右人聞仁義所爲相與悲歎曰獨吾郡乃得蕃人以是多無歸者天復三年仁義遣衆盡焚東塘戰掉結連宣州田頽以叛潛兵襲常州刺史李遇設伏於路率兵前戰因極罵仁義仁義止其衆曰遇何敢辱我至此是有伏兵也偵之果然仁義戰久而敗遇因襲之至夾岡仁義立二幟於岡上乃解甲而食無敢追者行密遣王茂章李德誠及仁義仁義不毀濠梁常開門出戰與茂章對敵無不先告所中而後射之故諸將多挫銳



而止以是歷年不能破天祐二年仁義之衆漸寡自度終不濟乃擁其家屬登城樓外衆無敢登者呼李德誠謂曰汝最福人可以委吾命擲去弓矢令德誠執之父俱斬於廣陵市

朱延壽

延壽廬州舒城人行密之妻弟也美姿容未冠事行密從征秦畢孫儒皆以摧堅陷陣受賞行密鎮維揚授延壽以干城之任時軍中多盜行密方務寬恕求得士伍心知延壽好殺每捕至者必并所盜物遺而賞之仍誠

之曰慎勿使延壽知既而密報延壽俱復擒殺之乾寧初黃州吳某歸欵遣延壽援之狗地蘄陽而還從圍壽春城堅不可拔將捨之延壽請以所部試往臨城一舉而破城中市不易肆以功署淮南節度副使壽州刺史明年取蘄光二州以功遷團練使四年從征葛從周於淝河敗之是後梁將屢寇淮上延壽每開關延敵未嘗敢逼天復初北司擁駕西幸昭宗聞延壽有武幹遣李儼間道賫詔授延壽蔡州節度使令促行密與諸道犄角共誅梁祖會鳳翔圍解而止田頔安仁義結構延壽



九國志卷三  
六  
叛將分地而治行密憂形於色卽詐爲目疾每接延壽使必錯亂所見以示之嘗誤觸楹柱而朱夫人救之良久始蘇因泣曰吾今喪目軍府事大兒子輩俱幼不如得三舅代治吾無憂矣夫人因以書召之延壽不疑遂來覲行密迎至寢門使人刺殺之年三十四出夫人嫁蘄州刺史石膳旣而朱瑾入賀行密曰彼二大賊不足憂惟憂此小賊今得之無事矣延壽善用兵有鈴畧好以寡擊衆不勝敵而反者無不盡戮之嘗與梁人戰遣衆二百持大劍而往內指一卒留之卒云願攻賊自效

延壽亦斬之其令出必行皆此類也性疎財每得賞賜皆分資將士李昇建國以延壽子鄴列於環衛復其官爵

徐溫

溫字敦美東海朐山人少無賴入羣盜中以販鹽爲事中和二年行密起合肥遂隸帳下爲伍長常從行密征討先登陷陣敵人畏之及平秦彥虜趙鏗敗孫儒溫皆有功奏授衙內右直都將左長劍都虞侯又從平濠泗有功授隨身都知兵馬使檢校工部尙書天復二年昭宗徵兵入援行密將赴之議以戰艦運糧溫曰人



吳舟楫不敢南行岸谷既變葭葦且深必不繼矣遂令以小艦易之師次宿州重載不能進士卒甚饑惟小艇先至一軍賴之行密嘉之由是參預謀議討安仁義於京口諸軍頻戰不勝行密遣溫率兵援之溫至城下盡易新製衣服旗幟悉用舊者仁義不知如常而陣溫乃麾軍奮擊遂敗之朱延壽入覲行密聞其來慮有內應召溫歸陰爲之備既殺延壽營中軍亂溫奮劍大呼斬其首惡者部分遂定既誅三叛以功授尚書右僕射廬州長使隨授右衙都指揮使天祚二年行密疾病渥出

鎮宣城將行溫謂渥曰公有病而令嫡嗣出外必姦臣爲之不可不防他日有徵召非王令某手書非某之使幸勿應命也渥泣謝而行後行密問後於判官周隱隱以劉威對諸將皆無言溫進曰宣州既賢且長國之令嗣不可廢也乃召渥歸行密疾甚召溫與左衙都指揮使張顥同受顧託渥既嗣位憤大臣擅權政非已出乃置東院馬軍置立親信以爲心腹溫與顥頗忌之故顥將圖弑逆溫知其謀而無所諫止但引嚴可求與之計事顥既弑渥白溫議分國兵共歸欵於梁祖溫僞許之



乃與可求謀使鍾章姚克瞻程思忠等入殺顥温稱疾  
不朝嚴兵於第以防不克是日章等斬顥温乃入悉收  
賊黨紀祥等誅之遂兼左右衙事無大小皆專斷始立  
制度戢兵明禁人漸安堵温謂可求曰大事定矣與公  
等克已行善政使人家解衣而寢於是聞者莫不感激  
滑襲位遷温昇州刺史淮南節度副使七年起復檢校  
太尉潤州刺史浙西觀察使內外馬步軍指揮使是時  
大臣劉威陶雅李簡之徒皆與行密同起義勲高任重  
温以一旦之功起居其上皆內意不服李遇嘗謂人曰

徐温何人吾素所未識而遽至此豈可入覲耶乃密議  
誅温温知其謀遣柴再用討之遇出降遂夷其族於是  
雅等始懼而來覲温盡禮事之如見行密雅等乃安中  
外遂定以平李遇功加平章事遷行軍司馬領浙西節  
度十二年温請就藩以治舟師乃加浙西招討使封齊  
國公以金陵京口毗陵宣城新安池陽六郡爲都督府  
温以金陵形勝之地乃大城昇州建大都督府十四年  
温徙治金陵以第三子知訓爲淮南行軍副使留廣陵  
以輔政十五年知訓爲朱瑾所殺以長子知誥代焉時



中朝多事南北道絕諸將分守郡府雖尊奉盟主而政令征伐多以便宜從事温以都統權不足臨制乃定冊建吳國改年武義稱制拜温大丞相封東海郡王越人攻常州温率衆拒之戰於無錫大敗越軍越人多舟師是歲旱江河皆竭諸將白温曰此天亡越之時也可盡車徒之勢一舉而滅之温曰天下紛紜民甚困矣錢公亦未可輕也若連兵不解方爲諸君之憂今戰勝以懼之戰兵以懷之其勢不得不服使兩地之民各保室家吾輩亦高枕爲樂豈不快哉多殺何爲乃遣使盡以俘

歸之於是越人請和順義三年後唐莊宗滅梁始通使於朝五年封温東海王賜車輅黻冕七年十月卒於金陵年六十六追封齊王諡忠武



九國志卷三終

九國志卷四

宋 路 振 撰

南唐烈祖以晉天福二年受吳禪至後主煜乙亥歲國滅蓋宋開寶八年也歷三主凡三十九年

烈祖姓李名昇字正倫小字彭奴徐州人初為徐溫養子冒姓徐氏名知誥吳太和二年嗣溫位天祚元年封齊王三年受禪改元昇元國號齊尊溫為太祖武皇帝昇元三年二月乙亥改太祖廟號為義祖己卯改國號曰唐復姓李氏更今名七年二月庚午薨年



五十六諡曰光文肅武考高皇帝廟號烈祖葬永陵  
元宗名璟字伯玉初名景通昇長子昇元七年三月己  
卯嗣位改元保大十五年改元中興是年臣屬於周  
奉正朔蓋周顯德五年也宋建乾元年六月己未薨  
年四十六請於宋許復帝號諡曰明道崇德文宣孝  
皇帝廟號元宗葬順陵

後主名煜字重光初名重嘉璟第六子宋建隆二年六  
月嗣立在位十七年至開寶八年十一月宋將曹彬  
滅其國後主降太平興國三年七月辛卯薨年四十

二是日七夕也贈太師封吳王葬洛陽北邙山

南唐

周本

本舒州宿松人漢南郡太守瑜之後祠廟隴畝皆在子  
孫守故土者猶數十戶本少孤貧嘗在田里獨格猛虎  
唐末大亂投楊行密軍中以勇敢聞常先登深入蒙犯  
矢石身無完肌及歸營自燒鐵烙其瘡飲啗言笑自若  
軍中猛將皆服之累遷淮南馬步軍使天祐五年楊氏  
始得江西撫州刺史危全諷率諸郡兵十萬來爭其地



屯於象牙潭楚人取高安爲之援江南守將劉威告急判官嚴可求荐本可用時本從軍圍蘇州不克恥之稱疾不出可求卽臥內強起之本曰蘇州之役非彼彊我弱也蓋上將權輕下將專命故爾今必見用願無任偏裨可求爲言楊氏許之得選兵七千使救高安本曰楚人非欲取高安也爲全諷聲援爾若先敗全諷楚人必走乃疾趨象牙潭劉威要之宴犒不留或曰賊勢甚盛宜審觀形勝定計而後進何其遽也本曰賊有十倍之衆使吾軍知之必將奪氣須乘其銳而用之旣至指授

諸將戮力急攻大破其軍擒全諷諸郡之兵皆潰楚人果遁吉州刺史彭玕信州刺史危仔昌棄城走於是江西之地始定以本爲信州刺史越將陳璋據衢州歸歛越人圍之本受命以兵迎璋旣至越人解圍陣於城下璋以其衆來奔裨將呂師造曰賊去我咫尺而勒陣不動是輕我也必擊之本曰吾受命迎陳使君陳君今在此吾事訖矣何爲復戰且彼近而不動必有以待我也擊可勝乎待其先動擊未晚也璋亦以爲然乃還越人躡之至中道宿半夜佯驚棄輜重走先設伏於道左越



人急追至伏所前後夾擊盡殲其衆越人累至皆敗之唐莊宗入濟陽吳遣司農卿盧蘋使於濟陽莊宗問吳之名將存否而本預焉由是召入爲雄武統軍出爲壽州節度使移鎮廬州拜太尉中書令封西平王本不知書而愛重儒士賓禮寮屬不撓其權吏民愛之性純朴技藝無能者唯軍旅之事則如夙習烈祖將受禪徐玠周宗等以本及李德誠皆位望隆重故諷之以爲推戴之首本以昏耄仍不知時變皆少子祚左右其事時吳宗室臨川王濛廢處歷陽聞將授終乃殺監守者與親

信二騎趨詣本本將見之祚固執不可本怒曰我家郎君也何不使我一見祚閉中門拒之濛被殺吳室遂移本隨衆至建康勸進由是愧恨數月而卒子鄴有戰功亦至廬州節度使



九國志卷四終

九國志卷五

宋 路 振 撰

吳越武肅王以唐乾符二年起臨安至宋太平興國三年忠懿王納王歸朝凡三世五主有國九十八年武肅王姓錢名鏐字巨美杭州臨安人唐乾符二年二十四起兵討賊歷事四朝累加天下兵馬都元帥開府儀同三司尚父尚書令兼中書令上柱國吳越王後唐長興三年三月庚戌薨年八十一在位四十年諡武肅以王禮葬安國縣衣錦鄉茅山之原



文穆王名元瓘字明寶初名傳瓘鏐第七子後唐長興三年四月己未嗣位先是鏐以中原喪亂於梁開平元年改元天寶私行境中凡改元四天寶十六年寶大二年寶正六年至是以遺命用藩鎮禮仍遵中國年號在位十年於晉天福六年八月辛亥薨年五十五勅諡文穆葬於國城龍山之原

忠獻王名宏佐字元佑元瓘第六子晉天福六年九月庚申嗣位在位七年於晉開運四年六月乙卯薨年二十勅諡忠獻葬於龍山之西南原

忠遜王名宏侖字隆道元瓘第七子晉開運四年六月丙寅嗣位是時猶稱契丹會同十年閏七月漢以宏侖爲吳越王遂遵正朔十二月晦內牙統軍使胡進思等作亂劫幽衣錦軍傳位於弟宏俶居東府二十一年始薨年四十四諡忠遜以王禮葬會稽秦望山之原

忠懿王名俶字文德初名宏俶元瓘第九子漢乾祐元年正月乙卯嗣位宋開寶九年正月入朝四月歸國太平興國三年納土歸朝賜居禮賢宅端拱元年八



月二十四日薨諡忠懿以鹵薄鼓吹塋於洛陽縣之賢相里陶公原

吳越

杜建徽

建徽字延光新登人父稜廣明中爲鎮海軍節度副使歷常潤二州刺史兩浙行軍司馬黃巢之亂稜歸鄉黨保聚徒衆得十餘人號武安都鏐與董昌起兵石鏡及平劉漢宏其衆漸盛稜謂諸子曰吾每責人不過十罰則爲之傷心竊觀錢公每臨斬決皆談笑自若成大事

者必此人也遂率衆歸附於鏐光啓中從征薛朗以稜爲常州刺史尋遷潤州乾寧中安仁義逼東陽命稜率師討之仁義宵遁鏐平宣州以其降卒隸中軍號武勇都爲腹心稜常患之密遣人白鏐曰狼子野心稜觀武勇都士卒終非大王所蓄願易之鏐不聽及徐綰叛鏐思稜言遣祭其基建徽少彊勇不與諸昆弟類嘗自署軍事押衙稜聞之頗加詬責建徽出顧左右而歎曰大丈夫何止一軍校耶後隨稜歸鏐稜治常州爲淮人所攻建徽率兵馳赴父難未及境而城已陷遂還新登後



稜自淮南歸軍中嚴整無改稜甚嘉之累從征伐未嘗  
介甲所至輒有功軍中謂之虎子乾寧初從征董昌流  
矢貫臂而戰不輟開平中從征姑蘇與敵遇於河河梁  
斷策馬徑渡及岸而馬斃因葬之至今馬塚存焉徐綰  
之亂建徽率所部自新登來赴難或有勸鏐東保會稽  
者鏐未之答建徽按劍叱之曰事若不濟當同死於此  
誰敢東渡耶鏐甚壯之睦州陳詢叛建徽之姻也鏐疑  
建徽不言俄有睦州聽吏來降持建徽所遺詢書以示  
鏐皆戒勵語鏐大嘉歡賜建徽錢百萬從兄建思嘗譖

建徽言其第中蓄兵仗將爲異圖鏐遣人密視之一日  
建徽方食堂上使者至徑抵臥內建徽但食不顧鏐感  
悟益加殊待性儉率出入導從不過數人凡得賜予皆  
散施鄉里親族每朝使至鏐與之宴必指建徽以示之  
曰此杜丞相今日至此皆其力也其孫昭達爲宏佐內  
都監使盛治第宅建徽乳臭兒不諳事乃爾後昭達果  
以罪誅嘗從擊踰于廣場盤辟大呼舊所中箭鏐忽自  
臂中迸出人皆壯之初稜之將死也散財物於諸子至  
建徽但得一笏謂曰此吾所秉者唯汝能保之建徽自



授節鉞至於丞相封鄖國公皆奏授朝命子弟多至二千石連姻公室人稱其盛乾祐三年卒年五十八

鮑君福

君福字慶臣餘姚人少羈貧性淳厚有膽勇餘姚有井面濶丈餘橫以雙梁水深不可測君福每醉必寢其上及從軍以驍勇聞初事劉漢宏及鏐東討乃率其黨來附號曰歸明都累從征討有功能馬上輪兩劍望之若飛電沈黙少語軍中謂之鮑不關淮人寇三衛以君福爲應援使屬刺史陳章叛淮人入其城楊行密令其將

李元嗣監守君福署以郡職君福不受鏐聞之恐其被害也乃密與絹書令其就職君福竟拒之一夕與元嗣飲伺其醉而殺之奔歸錢塘授衢州刺史淮人屢寇其境君福每擊破之及罷歸鏐勞之曰公在郡數年戰鬪而已豈爲優賢邪因復遣之任元瓘領清海軍節度辟爲副使同平章事兼侍中天福五年卒年七十七

成及

及字宏濟錢塘人祖克平唐嘉王府長史父貞國子監博士及性純厚爲鄉里所知光啟初江浙兵亂及保聚



於富春稱靜江都劉漢宏作亂及以所部兵從鏐討之  
漢宏平鏐宴犒諸軍北關鎮將孟安亂於席上拔劍將  
擊鏐坐中驚愕不敢動及徐起舉胡牀格孟安仆於地  
左右因擒殺之以功奏遷散騎常侍靜江軍都指揮使  
潤州刺史薛朗常州刺史丁從實叛鏐命及討之破朗  
軍於陽羨進圍毗陵從實具牛酒以犒之並遺美女於  
諸將及大怒曰我當菹醢從實而食之今乃以酒炙女  
子悅我耶因盡索諸女斬之親督諸將攻陷其城從實  
遁走以功奏授越州防禦副使潤州刺史阮結卒命及

代之遷蘇州刺史乾寧三年淮人攻姑蘇常熟鎮將陸  
郢等以兵應之及不能守遂降於楊行密行密入城閱  
府庫多圖書藥物由是重之與歸淮南署行軍司馬及  
拜泣日及以百口託於錢塘姑蘇城陷不能忍決豈忍  
更圖富貴願以一介之軀贖百口之命乃引佩刀將自  
刺行密遽起執其手因厚禮而歸之鏐迎勞郊外把袂  
以泣署鎮海軍節度副使徐綰之叛從鏐還至北郊鏐  
微服將入城及代乘其車行與賊鬪鏐遂得入綰平奏  
授保大軍節度使遷彰義軍加開府儀同三司乾化三



年卒年六十七

顧全武

全武越州餘姚人少時常爲僧博通外學機警有才畧  
鏐每延接與語甚器之及入都建國因辟令從戎以爲  
裨將軍中號曰顧和尚討賊有功累遷武勇都知兵馬  
使乾寧三年董昌據越州叛遣裨將崔溫李蕙率兵屯  
石侯全武率衆擊破之臨陣斬溫蕙湖州將徐應起兵  
以應昌與淮人圖嘉禾全武擊破其烏墩光福二柵以  
屯西陵三年昌將徐珣李元賓據肅清四封九卿之地

全武自西陵擊破之珣元賓皆乞降盡總其衆昌又遣  
裨將湯白守石城袁邠守餘姚全武自西陵趨石城與  
白遇大戰石城東斬首十餘級白僅以身免去會稽三  
十里不敢出援復攻餘姚袁邠堅壁自守昌遣將徐宣  
率兵援邠全武潛師斷其要衝俟軍半過橫出擊之殺  
二百餘人擒徐宣翌日袁邠以城降全武進軍圍會稽  
昌閱戰五雲門懸玉帛以誘我師全武率勵諸將并力  
擊之昌懼退入城中遷全武諸軍都虞侯東面都知兵  
馬使遂攻五雲門時淮將臺濛陷姑蘇鏐欲遣全武屯



西陵以備北寇全武曰賊之根本繫於越州豈以失一姑蘇而遂緩大眾耶當先拔越州後復茂苑未爲晚也繆從之俄而越州陷執董昌以歸奏加全武檢校太保明州刺史四年與沈夏許再思率師由海路以赴嘉禾諸將欲緩入全武曰嘉禾圍閉久矣莫知我之勝負宜速往慰之因倍道而進城中見我軍旂幟皆稱萬歲全武與昌將李宗禮頓全戰於城外大破之獲頓全宗禮以歸餘衆遁去俘千人以歸嘉禾平時吳將田頽守吳興聞之亦遁去全武追襲百餘里斬馘沈溺者千計遂

督衆克復蘇州吳將臺濛棄城遁去時淮軍屯崑山全武擊破之擒吳將秦裴光化二年加贊忠去僞功臣天復初淮將李神福攻衣錦城繆遣全武率兵禦之全武素輕神福領衆夜掩其軍爲神福所敗執全武送於淮南繆方食聞之大驚以匕擊案曰喪我良將二年楊行密遣使來求秦裴因歸全武繆大喜以秦裴報之是歲徐縮許再思援叛圍外城繆懼縮據會稽將令全武領兵屯越州全武曰東府不足往當詣邗溝繆曰何也全武曰縮急必召田頽來則淮南興師矣繆乃令全武行



成於吳全武又曰獨行必不濟請擇諸公子與之同往  
繆乃以元璪聘楊氏與全武俱行至廣陵楊行密乃遣  
使召頽還師明年全武與元璪同歸長興初以疾卒年  
六十五全武寬裕有謀畧善撫士卒喜怒未嘗形色每  
大敵在前鼙鼓動地分布行陣頽指口授怡怡加也嘗  
圍淮將秦裴於崑山裴援絕不降頽殺傷士卒全武自  
爲長檄以諭裴裴乃封函納款全武喜召諸將觀之既  
發函乃佛書一卷蓋以全武曾爲僧也諸將失色全武  
大笑曰爾不卽死何暇相諱也及裴降乃爲言於繆卒

全活之時人稱其長者

黃晟

晟明州鄞縣人少驍勇始應募於望海鎮鎮中立表選  
魁梧者晟以矮陋不中選隸都虞侯林膺膺甚倚之後  
潛歸鄞江募衆據平嘉埭權知州事楊俱召補平嘉鋪  
將有衆千餘人初劉漢宏以台州賊婁文知明州事俱  
率兵擊破之其黨杜宗自寧海鎮率鄉豪據奉化晟自  
平嘉以所部兵擊之擒杜宗赦而不殺盡驅使還台州  
獲其粟帛悉屬於東道遷欽飛都副兵馬使徙奉化鎮



將餘姚鎮將相喜率衆侵越州董昌禦之不利晟領兵  
追喜殺之昌奏授晟左散騎常侍充浙東道東面副指  
揮使會明州刺史鍾季文卒晟遂據其郡晟好禮尙文  
士江東儒學之流多往之辟前進士陳鼎羊紹素以爲  
賓介頗加優待築居於城中謂之措大營董昌將僭竊  
晟每移書諭之及鏐舉兵乃率衆來應破越州晟功居  
多在任十八年開平三年卒時屬郡刺史卒多遺疏請  
立其子晟疾亟獨上疏不請以子爲嗣凡府庫所蓄必  
題曰送使鏐頗歎其忠順

卷五止

九國志卷六

宋 路 振 撰

前蜀高祖以唐大順二年入成都至後主咸康二年國

滅父子二世凡三十五年

高祖姓王名建字光圖許州舞陽人會黃巢亂與鹿宴  
宏等西迎僖宗於蜀時中和三月十二日也明年赴  
行在僖宗以爲諸衛將軍光啟二年三月再西幸李  
昌符焚棧道幾斷建控僖宗馬過煙焰中旣至興元  
命爲壁州刺史大順二年破陳敬瑄入成都爲西川



節度使天復七年九月建號曰蜀明年改元凡改元  
五武成三年永平五年通正一年天漢一年光天一  
年共在位十二年於光天元年六月薨梁貞明四年  
也年七十二諡曰神武聖文孝德明惠皇帝廟號高  
祖塋永陵

後主名衍字化源初名宗衍建第十一子光天元年六  
月癸卯嗣位改元乾德至六年改咸康是年十二月  
爲後唐魏王繼岌破滅出降時唐同光三年也明年  
四月己丑被殺於秦州驛年二十八

前蜀

王宗裕

宗裕建之宗屬幼從建入爲牙校善遁甲絕甘分苦得  
將士心大順二年與王宗祐克 州遷青衣刺史建伐  
梓潼爲第二指揮使建親督諸軍力戰宗裕必冒矢石  
以掖衛之東川平諸將爭功宗裕口未嘗言戰謙和接  
下人皆服其沈厚爲東川留守昭宗下詔加以真命武  
成初召歸總成都城內外諸軍事其導從不避成都尹  
崔隱隱懲其僕宗裕大怒入白建建曰京尹五大長官



汝有識之士也不能教戒參從反令我責大尹耶宗裕  
僂俛而出再爲東川節度副大使班白者攜幼以迎於  
道封通王永平初建興師取秦鳳州再至縣谷宗裕饋  
輓貢獻道路相望建以其盡瘁明年乃改東川爲武德  
軍以宗裕爲節度使宗裕旣秉旄鉞遂貪冒財貨以白  
金百兩作鋌鐫記年月每五鋌爲一束以生牛革裹之  
子諫曰牛革著物堅韌後難可開宗裕叱之曰何更開  
罷歸衍慰諭久之自謂功高以征伐爲已任築第蜀城  
中頗侵損民舍有酤者青陽家不徙去宗裕遣人以巨

虺寘其舍中復投以污穢酤者將訴於建宗裕懼而止  
又於郊外開廣林莽壞掘邱墓立亭榭鑿池沼樹花木  
攜妓縱酒爲樂一日方醉坐軒檻中見數人衣冠甚偉  
謂宗裕曰與君幽顯異路何相陵太過因相顧大笑宗  
裕亦笑遽仆於地寢不數日卒

### 王宗壽

宗壽建宗人之子幼從征伐警悟有機辯好琴碁篇什  
方術皆臻其妙建入蜀奏署懷節度使以所部鎮遏江  
原縣嘗於許汝間得一鐵鏡晦不可鑿屢令工人瑩之



了無所睹著巾奩中有日矣至是忽覽之光采煥發因見市舍中一小兒青衣州角獨坐宗壽異而使人召之小兒曰何以知我至此宗壽以言怛之不懼因曰我與鐵鏡來耳公不見還神物終當化去若以還我他年當有報也宗壽出鏡與之乃長揖謝去後宗壽得辟穀行氣之術或謂小兒傳之乾寧初建令率所部兵平南充遂知果州事安輯離散得郡牧之體武成初封嘉王荆南高李昌略地三峽建以壽為忠州節度使兼行營招討使以鐵槩斷夷陵江李昌戰艦不能進宗壽禦之大

敗荆人李昌奔歸以功加中書令宗壽性方正樂於恬退自歸成都以修鍊自娛與孟繼平許寂楊珍為入室清談之友未幾為金吾上將軍持法平正院吏周郃受贓鬻獄宗壽捕鞫得其實郃以重貨求救於大闢為解宗壽不聽竟弃郃市建討鳳翔以宗壽為第三招討使取陳倉還衍襲位宗壽請閒久之衍耽酒色時宣華苑初成數為長夜飲宗壽在坐諫衍請以社稷為念少近盃酌因感激流涕佞臣潘在迎顧在珣韓昭等奏曰嘉王酒悲無怪也乃大為諧謔而罷後起為武信軍節度



使破雞子槽賊擒其魁李茂章請納賂以求免宗壽曰  
吾歷官四十年未嘗受同僚之遺况爾賊乎遽命斬之  
唐師入境郭崇韜遣使遺宗壽書宗壽不納聞衍降乃  
治裝赴闕時衍先次岐陽宗壽請於李嚴求謁衍衍見  
之泣下曰早從王言豈至今日及衍遇害奔入熊耳山  
依定林寺明宗卽位詣闕自陳賜與甚厚授保義軍節  
度使行軍司馬上表請葬衍許之初衍至秦川驛母妻  
及子弟遇害者十八人並藁葬道左至是宗壽盡易棺  
歛縞素徒步親自營護偕葬於三起村聞者義之明年

授淄州刺史卒

王宗鑑

宗鑑建從子也以偏裨從征建入閬州署都知兵馬使  
從征東川有功遷廣都鎮遏使天復中僖宗反正建令  
宗鑑以所部兵奔問行在授北路第二班馬步軍排陣  
使建親征山南以宗鑑爲御營使師還留屯平利時岐  
將劉知俊等統領大軍分路來攻由階成路奪固鎮糧  
宗侃唐襲等禦之至青泥嶺爲知俊所敗退保西縣會  
大雨漢江漲宗鑑自羅村得鄉導緣山而行數百里與



宗播遇於鐵谷合軍出湯頭時知俊自斜谷山南直抵  
興州圍西縣軍人散掠巴中宗鑷與宗播襲之會建亦  
至遂解西縣之圍以功遷山南節度使同平章事從征  
秦鳳遷中書令衍襲位加太保乾德六年卒

王宗佶

宗佶豫章人本姓甘氏幼穎利建討徐堂舉於江西獲  
之憐其慧黠是時諸子未生遂收爲養子每給事帳下  
後從建入閩中隨諸將征討有功補貔虎都指揮使遷  
嘉州刺史乾寧中建克縣州以宗佶爲兵馬留後尋加

檢校太傅知節度事未幾移鎮梓州昭宗幸鳳翔建遣  
宗佶與宗滌等率步騎迎駕至山南降節度使王萬宏  
以功加檢校太尉武成初進爵爲公拜開府守中書令  
宗佶恃其位隆地長頗專征伐而諸將皆避之多樹朋  
黨策勳錄舊高下在心附順者超擢違戾者擠之散地  
及宗懿等兄弟成長內不自安遂與御史中丞鄭騫判  
官李綱謀求爲方鎮欲爲亂建知之因進封晉國公罷  
其機務宗佶憤怨陰養死士出入臥內將圖不軌鄭騫  
等又教宗佶求爲大司馬盡總六軍并乞爲儲貳表連



上而辭甚不遜建未之罪也忽一日請對言詞甚悖建  
勉諭令出終不肯因叱衛士撲殺之騫鋼並賜死

### 王宗翰

宗翰建之姊子也本姓孟氏建爲神軍使僖宗封其姊  
爲晉國夫人宗翰最被親愛建入蜀以宗翰爲拱辰軍  
使累遷眉彭二州刺史封集王賜姓王氏授文成等州  
招討制置使宗翰好蓄妓妾後庭珠翠常百餘人性殘  
虐吝嗇刺彭州日部民史氏有胡讓莊號爲沃饒宗翰  
殺史氏而取之元膺之亂以兵入衛建令安撫元膺倉

卒而死建疑宗翰殺之竟無以自辯通正初授通義軍  
節度使同平章事守興元尹以杜堯嗣爲之佐令規正  
焉宗翰於泉倉置寨於捍龍山與上清寨相接分鄉兵  
屯守建畧地秦隴以宗翰爲第一招討使拔大散關取  
陳倉耀兵三壘而還宗翰所爲不法堯嗣多諫止之及  
爲招討使請堯嗣同行至大散關堯嗣腹疾請歸府乃  
自木皮店泐流而去宗翰令以膠船載之中流而溺天  
漢元年宗翰被病若見堯嗣旣而堂宇藩溷隨其大小  
皆堯嗣在焉疾遂亟數日卒



王宗滌

宗滌潁川人本姓華名洪建將入蜀寡勇敢之士以宗滌爲廐將宗滌膂力驍果輕財好施爲士卒所推得隸神策軍爲小校建入成都以宗滌領前鋒兵奪星宿寨進攻七里亭以功奏授威信都指揮使邠州王行瑜與鳳翔李茂真攻楊守亮於山南鳳州節度使滿存禦之爲茂真等所敗存與守亮退保山南茂真逼之因同奔閬中建令宗滌率兵禦之破存等衆斬其將梁承裕俘數千人景福元年授邛州刺史爲都指揮使攻九隴守

亮遣將符昭率兵解九隴之圍直趨成都營三學山建亟召宗滌歸夜至古城去昭營數里乃多設更鼓遲明益張旂幟徧諸山谷昭疑蜀師不敢出戰宗滌命發機石擊昭營中聲震山谷昭恐懼乃夜遁去宗滌回攻九隴拔之後從建攻梓州宗滌以衆五萬先趨東川與岐將李繼徽遇於元武宗滌擊敗之以功賜名五十三指揮之首梓州陷顧彥暉降其兵七萬餘衆遂以宗滌爲東川留守光化初奏授東川知節度副大使事二年歸覲遂以疾乞解職建不許昭宗反正梁祖與崔允叶通



盡誅中官更相引兵輦轂之下咫尺不通昭宗密遣中官仇承坦諭旨於建建遣宗滌與宗佶宗播率步騎迎駕至山南逐王萬宏據其城授山南節度宗佶等以其功高構以飛語建疑之因至詰讓將加之罪宗滌對曰天下寇盜平矣是大王聽邪說誅功臣之秋也建曰昨在大謾天寨中已有不軌之言矣我念汝之勤尙爲隱忍今又狂率如此豈憲章之所容也宗滌不顧而起建因令人監歸本營明日盡削官爵流於松州旣行縊之於城外營中將士聞之皆相對掩泣初建開國造端門

新樓名曰紅樓采繪旣畢都人士女競往觀之曰看盡紅樓建以宗滌得軍情復有是讖故誅之人稱其冤

### 王宗侃

宗侃許昌人本姓田名師世爲鄉豪隸名忠武軍籍建爲部將奏署宗侃決雲都兵馬使光啟中田令孜逼僖宗西幸道出陳倉建率宗侃同扈蹕又從建起閬中賜姓名討陳敬瑄敬瑄遣漢州刺史張頊領萬餘人來逐戰宗侃擊破之敗句惟立於學射山韋昭度來鎮西川敬瑄遣將山行章將兵六萬拒戰宗侃破之於浣寨縣



州刺史常厚奪留東川顧彥暉旌節建令宗侃討之破其七寨厚奔縣谷奏授宗侃雅州刺史遷眉州團練使未幾授武信軍節度使建開國以宗侃有佐命功進侍中城內外都指揮使尋加中書令充北路行營都統岐將李彥琛寇漢川宗侃保安遠城與宗鑑等三將同破岐軍斬彥琛衍襲位封侃爲魏王卒年六十六子承肇入洛爲行軍司馬

王宗瑤

宗瑤字寶臣燕人也本姓姜名郅以騎射隸許昌軍籍

中建擢爲隊長建迎駕山南宗瑤以勇伉得隸左神策軍能馬上盤槊長丈八尺每臨陣馳突人望而畏之遷威猛副兵馬使建入閬州爲先鋒十九都都頭左威猛都知兵馬使賜姓王氏更今名軍至縣竹誘諸蠻酋帥蹇諫等得其兵數千人破常厚授蜀州刺史昭宗幸蜀石門詔建赴難以宗瑤爲北路行營都指揮使奏授嘉州刺史天復中授武信軍節度使建開國加太子少傅後封臨淄郡王建病亟以宗瑤爲金吾使參預顧命衍襲位授太傅嘗自作高冢遇暇則酣酒高歌於其中無



疾忽一旦默坐而卒年六十七人以爲知死

王宗播

宗播字昌遠上蔡汝陽人本姓許名存少有膽勇秦宗權據上蔡召募豪傑以宗播爲裨校宗權爲梁祖所破部下皆逃散宗播亡抵荊州聞郭禹在歸州頗完聚得士卒心遂往依焉禹知其材令統青州元從兵三萬人時襄州兵圍逼荊州靜江遊奕將牟權領衆屯清江源據大山列寨諸營危窘宗播言於禹請計權於是伏兵清江岸中遣列校蔡行能捨舟直抵山下權素輕行能

罄軍來戰行能遁歸舟中權盡銳逐之宗播發伏兵掩其後擒牟權收其軍實以歸於禹禹大喜俄而荆師張瓌求救於禹命宗播率岐州兵解其圍禹度瓌懦弱因據其城秦宗權上蔡別將常厚以數千人由均房來攻夔州刺史毛湘棄城遁去保白帝厚圍之禹與宗播以十櫂子兵塞於南山以攻厚厚令夔校韓楚言罵禹禹不勝其辱宗播請以壯士五十人夜斫其營上赤甲山揭巨石投厚寨中厚恐懼與百人遁去遂破其寨復取夔州毛湘奔成都禹令捕韓楚言已爲其妻所殺矣先



是楚言妻李氏語其夫曰君嘗爲常司空罵郭尙書今  
寨柵危急鋸解之苦旦夕至矣不如早爲之所楚言不  
忍曰且看事勢李度楚言終不引決乃以刃自後斷其  
首并殺二男一女曰無爲他人所魚肉也遂自刎死禹  
聞之大驚駭爲給棺殮刻石以旌之留行軍劉昌美守  
夔州與宗播泝江而上郡縣望風而潰號宗播爲許掃  
土禹至萬州賞功以宗播爲萬州刺史宗播不得志居  
歲餘禹遣人偵之見宗播不治州務但出蹴踘乃曰萬  
州必背我勾脚力耳遣卒三百襲之宗播踰垣夜遁遲

明其衆稍至遂保豐都禹攻之宗播奔成都建得之甚  
喜命以所部屯蜀州賜姓名奏授縣州刺史建討王萬  
宏以宗播爲前鋒破金牛黑水西縣褒城四寨乘勝傳  
其城萬宏降以功奏授漢州刺史加檢校太保建卽位  
改金吾衛上將軍預彭州團練使岐將劉知俊圍西縣  
宗播爲四面招討馬步使夾廉讓水置連珠寨首尾相  
應以勁卒二百出五動礮擊之岐軍大敗遷武信軍節  
度使又敗諸蠻於潘倉加兼中書令爲三招討攻隴州  
降李繼宓封臨穎郡王被病歸建至其第執手曰北面



開拓公之力也衍襲位授太子少傅乾德五年卒年六十八

王宗鈇

宗鈇許昌人本姓李名武父裕爲忠武軍小校鈇少無賴善騎射建募義兵迎駕得宗鈇以隸帳下至岐山屢有戰功署爲隊長節遷爲裨將以勇過人號爲武子路建入蜀賜姓名常寘左右遇敵必自挑戰挾人奪馬而還遂爲軍中所推建攻成都一日城內出數騎直抵七里橋宗鈇因躍馬奪關子門蜀將宗行能策馬援槊而

至將及宗鈇佯墜馬奪槊以刺行能徑走入城宗鈇逐之至門而還建慰勞久之撫背曰吾得成都當着汝十死洎建開國授普州刺史性輕率好貨恃勇不法未周年以訟免官歸成都

王宗弼

宗弼許州人本姓魏名宏夫以家籍隸忠武軍建討王仙芝尙君長皆在帳下建取閬中補義勇都十將賜姓名及入成都改左驍騎都知兵馬使累遷嘉眉二州刺史建征果州宗弼掠地於飛鳥爲顧彥暉所獲彥暉責



之曰王公是討而君爲大將不能諫止何敢來見宗弼  
曰罪固當死但念平昔與相公有素故敢來也彥暉笑  
而釋之先是岐將常厚攻梓州彥暉乞援於建建遣宗  
弼等援之臨行建謂宗弼曰汝等破賊彥暉必犒汝汝  
當報宴俟彥暉至營中則擒之俱來庶免後舉也宗弼  
如其約及將報宴而宗弼告之彥暉遂以疾辭故宗弼  
以爲言於是厚待宗弼以爲養子及彥暉兵敗建圍之  
益急彥暉弟彥瑤有武勇知其城必陷請彥暉聚族沈  
飲自裁無爲它人之所魚肉一日城陷彥瑤仗劍入室

宗弼與諸子尙在彥暉顧宗弼曰爾非我子可自求生  
也因壞垣而出彥瑤遂刃彥暉與諸子而自刎建入梓  
州宗弼束身自歸建待之如故逾年復令將上軍再授  
嘉州刺史封鉅鹿郡王天貞軍節度使衍襲位拜宮城  
內外都指揮使判六軍事封齊王衍將往秦州宗弼曰  
唐兵壓境秦州何可去耶又上表切諫衍怒擲之於地  
衍次利州唐師已入散關陷鳳州衍遂遣三招討屯三  
泉以拒唐師未戰三招討俱遁走因令宗弼守緜谷而  
誅三招討宗弼遂與三招討同送欵於魏王乃還成都



斬宋光嗣等函首送於魏王遷衍及母妻於西宮貴戚  
納金寶進妓妾救死於宗弼者不可勝計微有絀誤者  
咸遭戮焉盡輦內藏之寶貨歸於其家魏王遣使徵犒  
軍錢數千萬宗弼輒勒之魏王甚怒及王師至令其子  
承班齎衍玩用直百萬獻於魏王并賂郭崇韜請以已  
爲西川節度使魏王曰此我家之物也焉用獻來魏王  
入城翌日數其不忠之罪并其子斬之於毬場軍士取  
其尸爓而食之先是蜀有謠言曰我有一點藥其名爲  
阿魏賣與十八子至是宗弼背國歸唐果其驗也

### 王宗範

宗範本姓張氏幼喪父隨母周氏再適建爲九夫人宗  
範年十歲冒姓王氏及建開國立周氏爲后宗範沈厚  
寡言好延納名士親從軍晉暉以女妻之封夔王加太  
子少師永平四年黎州蠻入寇以宗範爲第一招討使  
宗播宗壽副之乃以所賜金募果敢士出邛崃關至潘  
倉大破蠻衆斬其首領趙嵯政追奔至山口城與宗壽  
合殺八千餘人擒蠻王子趙龍眉等三人以歸加中書  
令後隨衍入洛至長安張錢爲節度留後宗範以珍玩



賂錢請復姓爲猶子易名師範後唐天成初王宗壽改  
葬衍師範來弔贈宗壽不與齒後爲雍州行軍司馬而  
卒

周博雅

博雅潁川人唐光啓中爲龍州司倉參軍考滿將歸闕  
以川路梗澁乃寓止縣谷建至博雅袖策謁建於軍門  
建素聞其名一見忻然接待甚厚置之賓博因說建曰  
唐祚將終有土疆者恣爲吞噬以強併弱然以僕觀之  
皆非濟世之具也明公御衆有術臨事能斷僕昨在龍

州已爲明公籌之矣自主上蒙塵明公親鞅乘龍匍匐  
棧道懷國璽以從周旋患難險阻之中勤亦至矣及論  
功受賞不過刺史今端守一隅坐待窘迫非君子豹變  
之象也且葭萌四會五達之郊非久安之地若不薄人  
人將薄我不如果閬地與民豪楊行遷爲陳田之肘腋  
控扼要害不修職貢以明公臨之可一鼓而擒也得其  
地以廣形勝得其士以增卒伍此策之上不可失也建  
然之遂取閬中之地乃奏署博雅爲判官建赴成都爲  
陳敬瑄所拒退無所保建甚危之博雅曰兵家勝負無



常古者出師自非晉重耳之賢豈有一戰而霸者今邛  
南城壁完粟支數歲取之可以斷蜀右臂願明公留意  
建曰吾少在戎行備知民意若無受鉞之將必謂自圖  
其利今欲請朝廷命將出征吾當助成其事博雅曰善  
乃令博雅作奏牘朝廷嘉之下詔褒獎乃授韋昭度西  
川節鉞令與建同討敬瑄割邛蜀黎雅四川爲永平軍  
節度使建壁靈池與王師戮力逾年會糧運不繼建欲  
請韋公班師因謂博雅曰韋公歸闕我當以兵塞劍門  
朝廷謂我何博雅曰今皇綱不振疆臣掣肘朝廷命令

不出閨壺明公當折節爲軍民計豈得顧此也於是建  
乃請韋公歸闕而上表自陳急攻成都克之奏授博雅  
觀察判官後出知渝州未幾詔加節度判官遷嘉州刺  
史建開國召拜成都尹遷御史中丞俄拜中書侍郎平  
章事建薨塋永陵博雅議山陵事俄請老遷左僕射出  
爲永平軍節度使雲南安撫使依舊平章事卒年六十  
六博雅本名詳犯孟知祥名  
蜀史追改之

晉暉

暉許州人父和爲忠武軍列校暉少有膽氣杜審權鎮



許昌以暉爲頭營十將從鹿宴宏迎駕至山南宴宏遲  
留不行暉素與建相善謂建曰鑾駕將回宴宏觀望不  
進而姑息吾輩甘言見誘苟不自圖去就禍且及矣不  
如以所部兵爲勤王之舉不爾爲晏宏所累且宮車反  
正以吾等爲賊黨何面目行於天下建然之遂俱行迎  
至三泉僖宗嘉之名其軍曰忠義以暉爲指揮使隸右  
神策軍及再幸褒斜復統南營兵與建同爲先鋒天子  
居梁暉統四部兵屯黑水修營棧道往來無阻朝廷慮  
其疆盛因罷拱衛授集州刺史以散其朋衆一歲之中

几厯數郡益欲窘之也建圖梓州遂往會焉建以暉爲  
壕寨使建開國授武泰軍節度使同平章事黔中郡縣  
多屬涪陵比部員外郎陳凝爲涪州守以暉制銜中不  
帶涪州刺史遂不納脾印暉上疏歸之凝責授瀘州司  
戶暉招來逋竄剷除蠹弊州民愛之罷上表請老日夕  
與親友宴談噓爲娛嘗自言曰吾生罹多難學執干戈  
者爲求飽煖耳今至此矣復有何望我嘗拔王宗魯於  
行陳今致位將相女復爲王妃矣分封宏農郡王卒年  
七十九



張造

造長社人父公素齊州長史造幼好兵家之學年二十應募隸忠武軍從鹿宴宏出征及宴宏據褒中心無回志因與建謀曰吾輩遠離鄉土保聚無名今大駕將回主帥反側或隨其逃遁則皆賊也不如率眾拱衛以取美名建納之遣使上表僖宗驛召旌賞遂參翊衛隸神策軍及再常袞中以扈從功授萬州刺史道阻不能去會建起兵閬中以造爲行軍司馬廣漢糧盡建慮軍情有變謀各據一郡以自固造首倡大義慰諭將士眾皆

感悅龍紀初詔授行營諸軍馬步都虞侯遷茂州刺史從討陳田引軍攻笮橋爲陳敬瑄所敗歿於陣年四十五建以其死事聞詔贈司徒子彥昭爲感德都知兵馬使從建收巴西破葛佐授劍州刺史建圍梓州彥昭攻堅力戰歿於陣建痛惜撫其尸以泣曰父死於前子繼於後忠勇之節出卿一門矣

張勅

勅長葛人善推步之學少隸忠武軍籍從討王仙芝以勇敢稱建以所部迎駕署勅義勇都判官復隸神策軍



乃總占候之要著太一元精秘訣譌七十一首以獻僖宗奇之詔與建同列從建起閩中破得陽寨斬王彥儔時建屢爲山行章所困勅每臨陣拔槩蒙輪殺十餘人敵爲之稍却奏署定信軍都知兵馬使大順中與王宗保同破浣花寨建將入成都城中多亡命不逞之徒建恐其構亂乃令勅爲諸都斬斫使兼左右廂都虞侯以誘掖鎮撫之勅旣入城索無賴者得百餘人悉鞭其胷死者相藉中外帖然不敢偶語建卽位厯眉邛二州刺史卒

### 李簡

簡許州長葛人少以驍勇隸忠武軍從鹿宴宏出征有功遷爲列校建起閩中簡爲義勇都副兵馬使大順二年陳田遣將屯西浦簡以所部擊破之武定節度使楊守忠與常厚舉兵援陳田建令簡逆擊之相遇於鍾陽簡謂諸校曰賊遠來多疲及其未成列擊之遂豎陣鳴鼓而進連破其七寨斬首千餘級擒其將楊知宥楊行立等獲其軍資甲兵不可勝計建攻毛湘於邛州以簡爲前鋒晉原守任從誨領步騎二萬銜枚奄至解邛州



之圍簡曰賊輕而驕正可用奇不勞與戰乃分步騎三千爲兩翼潛河村俟其半過夾擊之從誨敗俘甲馬數千俄而邛州軍使任可知斬湘以降建令簡入城慰撫景福中彭州部將李蕘率兵焚繁雒以援常厚建令簡逆擊之臨陣斬蕘遂進攻其城連拔七寨常遁走建獻捷於朝以簡爲邛州刺史卒於治所

潘在迎

在迎字亞卿前蜀樞密使炆之子身長六尺精神警悟少任俠不修細行交結屠狗天復中起家節度押衙王

建開國以爲扈蹕軍使檢校司徒守羽林大將軍內皇城使唐辰構難謀害宿將委在迎以腹心黜者旣行多以後命誅在迎妻徐氏后兄女爲營護之獲免衍荒於酒色在迎與韓昭輩多預宴官中自昏達旦王宗壽泣諫衍在迎等給以酒悲自是大臣結舌無敢言者王宗壽鎮果州以在迎爲都指揮使知州事渠江賊杜處齊招納亡命據巴王城在迎討平之以功授果州團練使魏王繼安平蜀補爲右職知祥鎮成都復令典兵未幾出爲蜀州刺史董璋遣使并輶於郡中置邸回易在迎



九國志卷六  
給事蓋仁達盜官麥以逃誣告在迎因并韜密餽金於董璋知祥命執仁達送於蜀州在迎斬之尋命在迎以州兵安撫後田乃服藥下痢以疾告召歸知祥親臨問焉遂請致仕從之嘗謂人曰我於前蜀有誅唐展安社稷功當合秉旄鉞今逮事霸王

一鎮不得命矣夫明德末卒於成都年五十六在迎以財發跡至於權門要地悉啗以厚利日未必盡仗之但 其冷語爾

九國志卷六 終



